



# UNDANG-UNDANG MALAYSIA

---

CETAKAN SEMULA

---

**Akta 173**

## AKTA UNIVERSITI TEKNOLOGI MARA 1976

*Mengandungi segala pindaan hingga 1 Januari 2009*

**AKTA UNIVERSITI TEKNOLOGI  
MARA 1976**

Tarikh Perkenan Diraja ... .. 25 Mei 1976

Tarikh penyiaran dalam *Warta* ... .. 31 Mei 1976

# UNDANG-UNDANG MALAYSIA

## Akta 173

### AKTA UNIVERSITI TEKNOLOGI MARA 1976

---

#### SUSUNAN SEKSYEN

---

##### BAHAGIAN I

##### PERMULAAN

###### Seksyen

1. Tajuk ringkas dan permulaan kuat kuasa
- 1A. Penubuhan Universiti adalah menurut Perkara 153 Perlembagaan Persekutuan
2. Tafsiran

##### BAHAGIAN II

##### PENUBUHAN UNIVERSITI

3. Penubuhan Universiti sebagai suatu pertubuhan perbadanan
- 3A. Ketidapkakaian Akta 30
4. Kuasa Universiti
- 4A. Kuasa tambahan Universiti
5. Meterai perbadanan bagi Universiti
6. Tempat Universiti
7. Cawangan Universiti
8. Sekolah dan Pusat
9. Penjalanan pengajian, secara bersesama, dsb., dengan mana-mana Universiti, dsb.
10. Kuasa am untuk menjalankan urusan
11. Kuasa untuk mengguna khidmat ejen
12. Fungsi tambahan Universiti

## BAHAGIAN III

## LEMBAGA

## Seksyen

13. Lembaga Pengarah
14. Kuasa dan fungsi Lembaga
15. Perwakilan kuasa Lembaga
16. Jawatankuasa Lembaga
- 16A. Senat
- 16B. Persatuan alumni
17. (*Dipotong*)
18. (*Dipotong*)
19. (*Dipotong*)

## BAHAGIAN IV

PEGAWAI DAN KAKITANGAN LAIN  
UNIVERSITI

- 19A. Canselor
- 19B. Pelantikan Pro-Canselor
20. Pelantikan, kuasa dan kewajipan Naib Canselor dan Timbalan Naib Canselor
21. Pendaftar
22. Bendahari
- 22A. Pelantikan pegawai utama lain
23. Pelantikan kakitangan lain
- 23A. Tatatertib kakitangan Universiti

## BAHAGIAN IVA

## PERUNTUKAN BERHUBUNGAN DENGAN PELAJAR

- 23B. Tatatertib pelajar Universiti
- 23C. Jawatankuasa Perwakilan Pelajar
- 23D. Penubuhan badan pelajar lain
- 23E. Pembubaran JPP atau badan pelajar lain

Seksyen

- 23F. Pelajar atau pertubuhan, badan atau kumpulan pelajar dilarang bersekutu dengan persatuan, dsb., kecuali jika diluluskan oleh Menteri
- 23G. Pelajar atau pertubuhan, badan atau kumpulan pelajar dilarang memungut wang
- 23H. Liabiliti jenayah pemegang jawatan, dsb., pertubuhan, badan atau kumpulan pelajar
- 23I. Anggapan
- 23J. Penggantungan dan pembuangan pelajar yang dipertuduh atas kesalahan jenayah atau yang terhadapnya kesalahan jenayah dibuktikan
- 23K. Kuasa Menteri untuk menggantung atau membuang pelajar daripada Universiti
- 23L. Dikeluarkan daripada atau ditahan daripada masuk ke dalam Universiti akan pelajar yang digantung atau dibuang

BAHAGIAN V

KEWANGAN

- 24. Penubuhan Kumpulan Wang
- 25. Kumpulan wang rizab
- 26. Anggaran tahunan
- 27. Akaun dan audit
- 28. Hadiah
- 28A. Pengeunaan surcaj

BAHAGIAN VI

AM

- 29. Kuasa Menteri untuk memberikan arahan
- 29A. Kuasa Menteri untuk mewakili
- 29B. Konvokesyen
- 30. Penyata, laporan, akaun dan maklumat
- 31. Perlindungan Pihak Berkuasa Awam
- 32. Pekhidmat awam
- 33. Obligasi merahsiakan
- 34. Prosiding sivil

Seksyen

- 34A. Perbuatan atau peninggalan yang dilakukan dengan suci hati
- 34B. Penyampaian
- 35. Kuasa Lembaga untuk membuat kaedah-kaedah

#### BAHAGIAN VII

#### PERALIHAN

- 36. Tafsiran bagi Bahagian ini
- 37. Pemindahan kuasa, hak, kewajipan, dll.
- 38. Pindah hak milik harta
- 39. Kontrak yang sedia ada
- 40. Penerusan prosiding jenayah dan sivil
- 41. Pindah hak milik wang
- 42. Penerusan pegawai dan pekhidmat
- 43. Pelajar
- 44. Prosiding tata tertib yang belum selesai
- 45. Cawangan
- 46. Pembubaran badan pengelolaan
- 47. Kuasa Menteri untuk meminda Bahagian ini

JADUAL PERTAMA

JADUAL KEDUA

JADUAL KETIGA

## UNDANG-UNDANG MALAYSIA

### Akta 173

### AKTA UNIVERSITI TEKNOLOGI MARA 1976

Suatu Akta untuk mengadakan peruntukan bagi menubuhkan, menyenggarakan dan mentadbirkan Universiti Teknologi MARA dan bagi perkara lain yang berkaitan dengannya.

[1 Jun 1976, P.U. (B) 278/1976]

**MAKA INILAH DIPERBUAT UNDANG-UNDANG** oleh Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti yang berikut:

#### BAHAGIAN I

#### PERMULAAN

#### **Tajuk ringkas dan permulaan kuat kuasa**

1. (1) Akta ini bolehlah dinamakan Akta Universiti Teknologi MARA 1976.

(2) Akta ini hendaklah mula berkuat kuasa pada tarikh yang ditetapkan oleh Menteri melalui pemberitahuan dalam *Warta*, tarikh itu tidak lebih awal dari tarikh pemberitahuan itu disiarkan.

#### **Penubuhan Universiti adalah menurut Perkara 153 Perlembagaan Persekutuan**

1A. Universiti Teknologi MARA ditubuhkan menurut dan mengikut peruntukan Perkara 153 Perlembagaan Persekutuan.

## Tafsiran

2. Dalam Akta ini, melainkan jika konteksnya menghendaki makna yang lain—

“Bendahari” ertinya pegawai kewangan utama Universiti, dengan nama apa jua disebut, yang dilantik di bawah seksyen 22;

“Canselor” ertinya Canselor Universiti dan termasuklah mana-mana orang lain, dengan nama apa jua disebut, yang dilantik sebagai Ketua Universiti, dan “Pro-Canselor” hendaklah ditafsirkan sewajarnya;

“Cawangan” ertinya sesuatu Cawangan Universiti yang ditubuhkan di bawah seksyen 7;

“ditetapkan” ertinya ditetapkan oleh kaedah-kaedah yang dibuat di bawah seksyen 35;

“ijazah” ertinya ijazah yang dianugerahkan kepada seseorang di peringkat Sarjana Muda atau peringkat Sarjana atau peringkat Kedoktoran oleh Universiti sesudah dia tamat mengikuti kursus pengajian dengan jayanya yang dirancangkan supaya membawa kepada penganugerahan ijazah itu atau yang setaraf dengannya;

“institusi pendidikan tinggi” ertinya sesuatu institusi pendidikan—

(a) sama ada atau tidak ditubuhkan di bawah mana-mana undang-undang bertulis; atau

(b) sama ada di dalam atau di luar Malaysia,

yang menyediakan pendidikan tinggi yang membawa kepada penganugerahan sijil, diploma, ijazah atau yang setaraf dengannya;

“Jawatankuasa Perwakilan Pelajar” atau “JPP” ertinya Jawatankuasa Perwakilan Pelajar yang ditubuhkan di bawah seksyen 23c;

“kakitangan” ertinya—

(a) mana-mana pegawai atau pekhidmat Universiti;

(b) mana-mana orang yang dilantik menjadi pensyarah oleh Lembaga, dan termasuklah profesor kanan, profesor, profesor madya, penolong profesor, *reader*, pensyarah kanan, penolong pensyarah, dan *tutor*; atau

(c) mana-mana orang yang diambil kerja oleh Lembaga;



“kampus” ertinya kawasan atau kawasan-kawasan, bersama-sama dengan segala bangunan atau struktur lain di atasnya, yang dipunyai atau digunakan, sama ada untuk selama-lamanya atau selainnya, oleh Universiti;

“Kumpulan Wang” ertinya Kumpulan Wang Universiti Teknologi MARA yang ditubuhkan di bawah seksyen 24;

“kursus pengajian” termasuklah program latihan;

“Lembaga” ertinya Lembaga Pengarah Universiti yang ditubuhkan di bawah seksyen 13;

“Menteri” ertinya Menteri yang bertanggungjawab bagi pendidikan;

“Naib Canselor” ertinya Naib Canselor Universiti yang dilantik di bawah seksyen 20 dan termasuklah mana-mana orang lain, dengan nama apa jua disebut, yang dilantik sebagai ketua pegawai eksekutif Universiti, dan “Timbalan Naib Canselor” hendaklah ditafsirkan sewajarnya;

“pelajar” ertinya seseorang pelajar berdaftar Universiti yang mengikuti apa-apa jenis kursus pengajian dari atau oleh atau di Universiti;

“Pendaftar” ertinya pegawai utama Pejabat Pendaftaran Universiti, dengan nama apa jua disebut, yang dilantik di bawah seksyen 21;

“Pengerusi” ertinya Pengerusi Lembaga yang dilantik di bawah perenggan 13(2)(a);

“persatuan alumni” ertinya persatuan alumni, yang ditubuhkan di bawah seksyen 16B, bagi Institut Teknologi MARA dan Universiti;

“Provos” ertinya pegawai utama eksekutif, pentadbiran dan akademik sesuatu Cawangan, dengan nama apa jua disebut, yang dilantik di bawah seksyen 7;

“Sekolah atau Pusat” ertinya Sekolah atau Pusat Universiti dan termasuklah Fakulti, Kolej, Jabatan atau Akademi Universiti, dan berhubung dengan sesuatu Cawangan, termasuklah mana-mana bahagian Sekolah, Pusat, Fakulti, Kolej, Jabatan atau Akademi yang ditetapkan bagi Cawangan itu;

“Senat” ertinya Senat Universiti yang ditubuhkan di bawah seksyen 16A;

“tarikh yang ditetapkan” ertinya tarikh yang ditetapkan oleh Menteri di bawah subseksyen 1(2);

“Universiti” ertinya Universiti Teknologi MARA yang ditubuhkan di bawah seksyen 3 dan termasuklah sesuatu Cawangan;

“Universiti” atau “Kolej Universiti” ertinya—

- (a) sesuatu Universiti atau Kolej Universiti yang ditubuhkan di bawah Akta Universiti dan Kolej Universiti 1971 [Akta 30];
- (b) sesuatu Universiti atau Kolej Universiti yang ditubuhkan di bawah Akta Institusi Pendidikan Tinggi Swasta 1996 [Akta 555]; atau
- (c) Universiti atau Kolej Universiti yang lain—
  - (i) sama ada atau tidak ditubuhkan di bawah suatu undang-undang bertulis; atau
  - (ii) sama ada di dalam atau di luar Malaysia.

## BAHAGIAN II

### PENUBUHAN UNIVERSITI

#### **Penubuhan Universiti sebagai suatu pertubuhan perbadanan**

**3.** Maka dengan ini ditubuhkan suatu Universiti dengan nama Universiti Teknologi MARA, dan dengan nama itu Canselor, Pro-Canselor, Naib Canselor dan anggota pada masa itu bagi Lembaga Pengarah dan Senat adalah dengan ini menjadi suatu pertubuhan perbadanan yang kekal turun-temurun, dan mempunyai kuasa penuh di bawah nama itu—

- (a) untuk membawa dan dibawa guaman;
- (b) untuk mempunyai dan menggunakan suatu meterai perbadanan dan dari semasa ke semasa untuk memecahkan, menukar, mengubah atau membuat baru meterai itu sebagaimana yang difikirkannya patut;

- (c) bagi maksud Universiti sebagaimana yang diperuntukkan dalam Akta ini, untuk membuat kontrak, untuk memperoleh, mengambil, memegang dan menikmati apa-apa jenis harta alih dan harta tak alih, termasuk apa-apa harta yang mungkin terletak hak padanya melalui pembelian, atau melalui sesuatu penukaran, pemberian, pendermaan, pajakan, pemindahan berwasiat atau selainnya;
- (d) bagi maksud Universiti sebagaimana yang diperuntukkan dalam Akta ini, untuk memindahhakan, menyerahkan, menyerahkan balik, memulangkan, menggadai, menjual, menggadai janji, memajak, menukar, mendemis, menyerahkan semula, memindahkan hak milik ataupun melupuskan, atau membuat apa-apa urusan mengenai, apa-apa jenis harta alih atau harta tak alih atau apa-apa kepentingan mengenainya yang terletak hak pada Universiti mengikut apa-apa syarat yang difikirkannya patut;
- (e) untuk menjalankan, melaksanakan dan menunaikan, mengikut peruntukan Akta ini, semua kuasa, fungsi dan kewajipan yang diberikan kepada, diadakan atau dipertanggungjawabkan ke atas Universiti oleh peruntukan itu.

### **Ketidakpakaian Akta 30**

**3A.** Akta Universiti dan Kolej Universiti 1971 tidak terpakai bagi Universiti.

### **Kuasa Universiti**

**4.** (1) Universiti, tertakluk kepada peruntukan Akta ini, mempunyai kuasa yang berikut—

- (a) untuk mengadakan kursus pengajian, untuk membuat peruntukan untuk penyelidikan, bagi mengadakan peperiksaan dan untuk mengambil apa-apa langkah lain yang didapati perlu atau dikehendaki bagi pelajaran dan latihan dalam lapangan teknologi, sains, perdagangan, perniagaan, perindustrian, pengurusan atau pentadbiran, atau dalam lapangan apa-apa kerjaya, di Malaysia atau di tempat lain;

- (b) untuk menganugerahkan ijazah, diploma, sijil dan kepujian akademik lain kepada orang yang telah mengikuti kursus pengajian yang diluluskan oleh Universiti dan telah memenuhi apa-apa kehendak lain sebagaimana yang ditentukan oleh Lembaga, atau yang ditetapkan;
- (ba) untuk menganugerahkan ijazah atau kurniaan kehormat kepada orang yang telah memberikan sumbangan terhadap kemajuan atau penyebaran pengetahuan atau yang telah memberikan khidmat awam yang cemerlang yang disyorkan oleh Lembaga setelah berunding dengan Senat;
- (c) untuk mengiktiraf ijazah, diploma dan sijil mana-mana institusi atau badan pendidikan sebagaimana yang ditentukan oleh Lembaga atau yang ditetapkan, bagi maksud penerimaan masuk untuk kursus pengajian dan peperiksaan Universiti;
- (ca) untuk mengadakan kerusi, jawatan pensyarah, dan jawatan dan jabatan lain, dan untuk membuat pelantikan kepadanya;
- (d) untuk mendirikan, melengkapkan dan menyenggarakan perpustakaan, makmal, dewan kuliah, asrama dan segala bangunan lain yang dikehendaki bagi maksud Universiti di Malaysia;
- (e) untuk mengadakan dan mengurniakan *fellowship*, biasiswa, dermasiswa, pingat, hadiah dan kepujian jenis lain, kurniaan atau bantuan berkenaan dengan pendidikan dan latihan yang diadakan dari atau oleh atau di Universiti;
- (f) untuk membuat kontrak dan untuk melantik kakitangan yang dikehendaki bagi maksud Universiti;
- (g) untuk melantik dan menaikkan pangkat kakitangan Universiti;
- (h) untuk menentukan syarat perkhidmatan kakitangan Universiti, termasuk skim perkhidmatan, tangga gaji dan cuti;
- (i) untuk menubuhkan skim pencen, persaraan, kumpulan wang simpanan atau kebajikan bagi faedah kakitangannya, dan untuk membuat perkiraan dengan mana-mana pertubuhan atau orang lain bagi menubuhkan skim itu;
- (j) untuk membuat peraturan dan mengadakan peruntukan bagi kediaman kakitangan dan pelajar Universiti dan kebajikan kakitangan dan pelajar;

- (ja) untuk memberikan pinjaman atau pendahuluan kepada kakitangan Universiti;
- (jb) untuk memberikan pinjaman atau bantuan kewangan kepada pelajar yang patut menerimanya atas apa-apa terma dan syarat sebagaimana yang diluluskan oleh Menteri;
- (jc) untuk menjalankan penyelidikan dan pengeluaran komersial bagi pemajuan dan penggunaan yang berkesan akan hasil penyelidikan Universiti;
- (jd) untuk memasarkan dan memfrancaiskan perkhidmatan, hasil penyelidikan, dan keluaran, Universiti;
- (k) untuk meminta dan menerima bayaran yang dari semasa ke semasa ditentukan oleh Lembaga, atau yang ditetapkan;
- (l) untuk melakukan semua perbuatan dan perkara, sama ada bersampingan atau tidak dengan kuasa yang disebut terdahulu, yang mungkin dikehendaki bagi memajukan pendidikan, latihan, kewangan, pentadbiran, kebajikan dan tatatertib dalam Universiti.

(2) Universiti boleh, dengan kelulusan Menteri, melalui perintah yang disiarkan dalam *Warta*, menyatakan—

- (a) Diploma dan Diploma Lanjutan yang dianugerahkan oleh Universiti yang telah diberi pengiktirafan oleh Kerajaan sebagai setaraf dengan ijazah pada peringkat Sarjana Muda; dan
- (b) tarikh Diploma dan Diploma Lanjutan itu diberi pengiktirafan oleh Kerajaan sebagaimana yang disebut dalam perenggan (a),

dan Diploma dan Diploma Lanjutan itu hendaklah diberi taraf ijazah yang dianugerahkan pada peringkat Sarjana Muda, dengan atau tanpa kepujian, mengikut mana-mana yang berkenaan, dari tarikh pengiktirafan sedemikian diberikan, walaupun tarikh pengiktirafan itu ialah tarikh sebelum tarikh permulaan kuat kuasa subseksyen ini.

### **Kuasa tambahan Universiti**

**4A.** (1) Universiti boleh, dengan kelulusan Menteri Kewangan—

- (a) jika didapati perlu, berfaedah atau sesuai bagi atau berkaitan dengan penjalanan kuasa, pelaksanaan fungsi dan penjalanan aktiviti Universiti, menyertai penyertaan

ekuiti, perkongsian, usaha sama, pengusahaan atau apa-apa bentuk kerjasama atau perkiraan yang lain bersama-sama, atau selainnya, dengan—

- (i) sesuatu perusahaan, syarikat, pengusahaan swasta atau sindiket orang yang ditubuhkan bagi menjalankan perniagaan di Malaysia atau di tempat lain;
  - (ii) Kerajaan Persekutuan atau mana-mana Kerajaan Negeri;
  - (iii) badan atau pihak berkuasa awam;
  - (iv) suruhanjaya; atau
  - (v) seseorang;
- (b) menubuhkan atau menganjurkan penubuhan syarikat di bawah Akta Syarikat 1965 [*Akta 125*] untuk menjalankan atau melibatkan diri dalam mana-mana aktiviti yang telah dirancang atau diusahakan oleh Universiti;
- (c) menubuhkan perbadanan untuk menjalankan dan yang bertanggungjawab bagi, mengendalikan dan menguruskan apa-apa harta, projek, skim atau perusahaan yang pada pendapat Universiti benefisial atau berfaedah kepada Universiti;
- (d) meminjam, atas apa-apa kadar bunga dan bagi apa-apa tempoh dan atas apa-apa terma sebagaimana yang diluluskan oleh Menteri, apa-apa jumlah wang yang diperlukan oleh Universiti bagi menjelaskan obligasinya atau bagi menunaikan mana-mana kewajipannya;
- (e) mendapatkan pinjaman di bawah perenggan (d) melalui penerbitan bon, debentur atau saham debentur dalam apa-apa kelas dan dengan apa-apa nilai atau untuk menggadaikan, menggadaijanjikan, menyandarkan atau selainnya mewujudkan lien ke atas hartanya, sama ada harta alih atau tak alih, atas apa-apa terma yang difikirkan suai manfaat oleh Universiti;
- (f) bagi maksud pelaburan, memperoleh dan memegang bagi pelaburan syer, saham, debentur, saham debentur, bon, obligasi dan sekuriti yang diterbitkan atau dijamin oleh—
- (i) mana-mana syarikat atau pengusahaan swasta atau mana-mana sindiket orang yang ditubuhkan bagi

menjalankan perniagaan di Malaysia atau di tempat lain;

- (ii) Kerajaan Persekutuan atau mana-mana Kerajaan Negeri;
- (iii) badan atau pihak berkuasa awam; atau
- (iv) suruhanjaya;
- (g) memperoleh syer, saham, debentur, saham debentur, bon, obligasi atau sekuriti yang disebut dalam perenggan (f) melalui langganan asal, tender, pembelian, pemindahmilikan, pertukaran atau selainnya;
- (h) menjalankan dan pada amnya menguatkuasakan segala hak dan kuasa yang diberikan melalui atau bersampingan dengan pemunyaan syer, saham, debentur, saham debentur, bon, obligasi atau sekuriti yang disebut dalam perenggan (f) dan khususnya untuk menjual, memindahmilikkan, menukarkan atau selainnya melupuskan syer, saham, debentur, saham debentur, bon, obligasi atau sekuriti itu; dan
- (i) membeli, memajak atau menyewa guna atau selainnya memperoleh dan melabur dalam apa-apa harta tanah dan harta alih yang perlu atau sesuai bagi mana-mana maksud Universiti.

(2) Peruntukan Jadual Pertama hendaklah terpakai bagi tiap-tiap perbadanan yang ditubuhkan oleh Universiti di bawah perenggan (1)(c).

### **Meterai perbadanan bagi Universiti**

**5.** (1) Meterai perbadanan bagi Universiti hendaklah meterai yang diluluskan oleh Lembaga dan meterai perbadanan itu boleh dengan cara yang sama dari semasa ke semasa dipecahkan, ditukar, diubah atau dibuat baru.

(2) Meterai perbadanan bagi Universiti hendaklah disimpan dalam jagaan Naib Canselor.

(3) Meterai perbadanan bagi Universiti tidaklah boleh dicapkan pada apa-apa surat cara selain daripada ijazah, diploma atau sijil kecuali di hadapan—

- (a) Naib Canselor atau, semasa ketiadaannya, seseorang pegawai utama Universiti yang diberi kuasa secara bertulis oleh Lembaga; dan
- (b) seorang anggota lain Lembaga yang diberi kuasa secara bertulis oleh Lembaga,

yang hendaklah menandatangani surat cara itu sebagai tanda bahawa meterai itu telah dicapkan di hadapan mereka, dan tandatangan itu hendaklah menjadi keterangan yang cukup bahawa meterai itu telah dicapkan dengan sempurna dan sepatutnya dan bahawa meterai itu ialah meterai Universiti yang sah.

(4) Meterai perbadanan bagi Universiti hendaklah dicapkan pada sesuatu ijazah, diploma atau sijil di hadapan—

- (a) Naib Canselor atau, semasa ketiadaannya, seorang anggota lain Lembaga yang diberi kuasa secara bertulis oleh Lembaga; dan
- (b) Pendaftar,

dan mereka hendaklah menandatangani surat cara itu sebagai tanda yang surat cara itu dimeteraikan di hadapan mereka, dan tandatangan itu hendaklah menjadi keterangan yang cukup bahawa meterai itu telah dicapkan dengan sewajarnya dan bahawa meterai itu ialah meterai Universiti yang sah.

(5) Meterai perbadanan bagi Universiti hendaklah diberi pengiktirafan rasmi dan kehakiman.

(6) Mana-mana dokumen atau surat cara yang (jika disempurnakan oleh seseorang yang bukan suatu pertubuhan perbadanan) tidak perlu dimeteraikan boleh dengan cara yang sama disempurnakan oleh Universiti dengan syarat bahawa dokumen atau surat cara itu hendaklah disempurnakan bagi pihak Universiti oleh Naib Canselor atau oleh mana-mana orang yang diberi kuasa secara am atau secara khas dengan bertulis oleh Lembaga.

### **Tempat Universiti**

**6.** Universiti hendaklah ditempatkan di Shah Alam, dalam Negeri Selangor, dengan syarat bahawa Menteri boleh, selepas berunding



dengan Lembaga, menggantikan tempat itu dengan sesuatu tempat atau tempat-tempat lain, atau menambahkan sesuatu tempat atau tempat-tempat lain.

### **Cawangan Universiti**

7. (1) Menteri boleh, selepas berunding dengan Lembaga, mengarahkan Lembaga supaya menubuhkan dan menyenggarakan Cawangan atau Cawangan-Cawangan Universiti di tempat atau tempat-tempat di Malaysia atau di tempat lain yang difikirkan perlu oleh Menteri bagi maksud menjalankan peruntukan Akta ini.

(2) Menteri hendaklah melantik berkenaan dengan sesuatu Cawangan seorang Provos Cawangan yang hendaklah menjadi pegawai utama eksekutif, pentadbiran dan akademik Cawangan, dan dia hendaklah menjalankan fungsinya dan menunaikan kewajibannya di bawah arahan dan kawalan Naib Canselor.

(3) Terma dan syarat perkhidmatan Provos hendaklah ditentukan oleh Menteri, dan Universiti hendaklah terikat dengannya.

(3A) (*Dipotong oleh Akta A964*).

(4) Menteri boleh, melalui perintah yang disiarkan dalam *Warta*, membuat peruntukan khas yang difikirkannya perlu atau suai manfaat bagi maksud pentadbiran Cawangan.

(5) Tiada sesuatu jua peruntukan sesuatu perintah yang dibuat di bawah subseksyen (4) boleh menjadi tidak sah oleh sebab ia berlawanan dengan mana-mana peruntukan Akta ini atau peruntukan mana-mana kaedah atau perundangan subsidiari yang dibuat di bawah Akta ini.

### **Sekolah dan Pusat**

8. (1) Universiti hendaklah dibahagikan kepada beberapa Sekolah dan Pusat mengikut sebagaimana yang ditentukan oleh Lembaga dari semasa ke semasa, dan Sekolah dan Pusat itu hendaklah mempunyai nama sebagaimana yang diberi oleh Lembaga kepadanya.

(2) Sesuatu Sekolah atau Pusat hendaklah diketuai oleh seorang yang dilantik oleh Naib Canselor.

(3) Ketua sesuatu Sekolah atau Pusat hendaklah bertanggungjawab kepada Naib Canselor dan hendaklah menjalankan kewajipan yang diberikan kepadanya oleh Naib Canselor.

**Penjalanan pengajian, secara berse sama, dsb., dengan mana-mana Universiti, dsb.**

9. (1) Universiti boleh, dengan terlebih dahulu mendapat kelulusan bertulis Menteri—

(a) menjalankan apa-apa kursus pengajian secara berse sama atau bersama-sama, secara gabungan, secara usaha sama atau secara francais atau selainnya, dengan mana-mana Universiti, Kolej Universiti, institusi pendidikan tinggi, atau badan profesional, atau mana-mana pertubuhan, di dalam atau di luar Malaysia; dan

(b) menjalankan mana-mana kursus pengajian itu sama ada keseluruhannya atau sebahagiannya di dalam atau di luar Malaysia.

(2) Kelulusan Menteri di bawah subseksyen (1) boleh dibuat tertakluk kepada terma dan syarat yang difikirkan oleh Menteri patut dinyatakan.

(3) Menteri tidak boleh memberikan kelulusan di bawah subseksyen (1) melainkan jika dia berpuas hati bahawa Universiti telah membuat segala perkiraan yang perlu dengan Universiti, Kolej Universiti, institusi pendidikan tinggi, atau badan profesional, atau pertubuhan yang berkenaan bagi menjalankan kursus pengajian itu.

(4) Dalam seksyen ini, “gabungan” termasuklah pengendalian program berkembar.

**Kuasa am untuk menjalankan urusan**

10. Tertakluk kepada peruntukan Akta ini, Universiti berkuasa untuk melakukan apa-apa perkara, dan untuk membuat apa-apa transaksi, yang pada pendapatnya adalah dikira untuk memudahkan

penjalanan yang sewajarnya akan kewajipannya atau pelaksanaan fungsinya atau penjalanan kuasanya di bawah Akta ini atau adalah bersampingan dengan atau berfaedah bagi hal yang demikian itu.

### **Kuasa untuk mengguna khidmat ejen**

**11.** Universiti boleh mengguna khidmat dan membayar ejen dan penasihat teknik termasuk peguam bela dan peguam cara dan orang lain untuk menjalankan urusannya atau melakukan apa-apa perbuatan yang dikehendaki dijalankan atau dilakukan dalam melaksanakan kewajipannya atau bagi menjalankan dengan lebih baik lagi maksud Akta ini.

### **Fungsi tambahan Universiti**

**12.** Sebagai tambahan kepada kewajipan yang dipertanggungkan ke atas dan kuasa yang diletakhakkan pada Universiti oleh Akta ini, Universiti boleh menjalankan apa-apa fungsi dan kuasa lain dan mentadbirkan dan membelanjakan apa-apa wang lain sebagaimana yang diperuntukkan atau diberi oleh Menteri kepadanya, bagi apa-apa maksud sebagaimana yang dinyatakan oleh Menteri, dan dalam melakukan sedemikian Universiti hendaklah disifatkan memenuhi maksud Akta ini dan peruntukan Akta ini hendaklah terpakai bagi Universiti berkenaan dengan fungsi itu, kuasa itu dan pentadbiran dan perbelanjaan wang itu:

Dengan syarat sentiasa bahawa akaun wang itu hendaklah disimpan berasingan dan terpisah daripada akaun Kumpulan Wang.

## **BAHAGIAN III**

### **LEMBAGA**

#### **Lembaga Pengarah**

**13.** (1) Maka hendaklah ditubuhkan suatu Lembaga Pengarah Universiti yang dikenali sebagai Lembaga Pengarah Universiti Teknologi MARA.

- (2) Lembaga hendaklah terdiri daripada—
- (a) Pengerusi;
  - (b) Naib Canselor;
  - (c) dua orang yang mewakili Kerajaan;
  - (d) lima orang yang kerana pengetahuan atau pengalaman mereka dapat, pada pendapat Menteri, membantu Lembaga, dan tiga daripada mereka hendaklah daripada sektor swasta.
- (3) Pelantikan anggota Lembaga, kecuali Naib Canselor hendaklah dibuat oleh Menteri bagi tempoh tidak melebihi tiga tahun dan apabila habis tempoh itu anggota Lembaga layak dilantik semula.
- (4) Pelantikan mana-mana anggota boleh pada bila-bila masa dibatalkan oleh Menteri tanpa memberikan apa-apa sebab mengenainya.
- (5) Menteri boleh melantik mana-mana anggota Lembaga untuk menjalankan fungsi Pengerusi—
- (a) jika bagi apa-apa tempoh yang lama Pengerusi tidak dapat, oleh sebab sakit, bercuti atau apa-apa sebab lain, melaksanakan fungsinya; atau
  - (b) semasa apa-apa tempoh kekosongan dalam jawatan Pengerusi.
- (6) Seseorang anggota yang dilantik sebagai Pengerusi di bawah subseksyen (5) hendaklah, dalam tempoh dia melaksanakan fungsi Pengerusi di bawah seksyen ini, disifatkan sebagai Pengerusi.
- (7) Pendaftar hendaklah menjadi Setiausaha Lembaga.
- (8) Lima anggota Lembaga hendaklah membentuk kuorum bagi apa-apa mesyuarat Lembaga.
- (9) Tertakluk kepada Akta ini, Lembaga boleh menentukan tatacaranya sendiri.
- (10) Peruntukan Jadual Kedua hendaklah terpakai bagi Lembaga.

### **Kuasa dan fungsi Lembaga**

**14.** (1) Lembaga hendaklah menjadi badan eksekutif Universiti dan boleh menjalankan semua kuasa yang diberikan kepada Universiti, kecuali sebagaimana yang diperuntukkan selainnya oleh Akta ini atau oleh mana-mana kaedah atau perundangan subsidiari lain yang dibuat di bawahnya.

(2) Fungsi Lembaga hendaklah termasuk menjalankan segala aktiviti dan melakukan segala perkara yang perlu atau berfaedah dan sewajarnya bagi mengelolakan, mengawal dan mentadbirkan Universiti.

### **Perwakilan kuasa Lembaga**

**15.** Tertakluk kepada syarat, batasan atau sekatan yang difikirkannya patut, Lembaga boleh mewakilkan kepada mana-mana ahli atau mana-mana jawatankuasa anggotanya kuasa untuk menjalankan bagi pihaknya kuasa, kewajipan atau fungsi yang diletakhakkan oleh Akta ini pada Lembaga sebagaimana yang ditentukan oleh Lembaga; dan mana-mana kuasa, kewajipan atau fungsi yang diwakilkan sedemikian boleh dijalankan, ditunaikan atau dilaksanakan oleh anggota itu atau oleh jawatankuasa itu, mengikut mana-mana yang berkenaan, atas nama dan bagi pihak Lembaga, tetapi tertakluk kepada arahan dan kawalan Lembaga.

### **Jawatankuasa Lembaga**

**16.** (1) Bagi maksud membolehkannya menunaikan kewajipannya dan menjalankan kuasanya, Lembaga boleh melantik apa-apa jawatankuasa daripada kalangan anggotanya sebagaimana yang difikirkannya perlu atau wajar.

(2) Sesuatu jawatankuasa yang ditubuhkan di bawah subseksyen (1) hendaklah mempunyai fungsi menimbangkan perkara yang dirujuk kepada Lembaga dan membuat syor yang sesuai mengenainya kepada Lembaga.

(3) Sesuatu jawatankuasa yang ditubuhkan di bawah subseksyen (1) boleh melantik, jika perlu, satu jawatankuasa kecil atau lebih pada kalangan anggotanya, atau ia boleh mengko-opt orang yang boleh memberikan sumbangan kepada pertimbangan telitiannya, tetapi seseorang yang diko-opt tidak mempunyai hak untuk mengundi.

(4) Pengerusi sesuatu jawatankuasa yang ditubuhkan di bawah subseksyen (1) hendaklah dilantik oleh Lembaga, atau, jika Lembaga mengarahkan, oleh anggota jawatankuasa di antara mereka.

(5) Tertakluk kepada Akta ini, dan kepada apa-apa arahan yang diberikan oleh Lembaga, sesuatu jawatankuasa yang ditubuhkan di bawah subseksyen (1) boleh menentukan tataranya sendiri.

(6) Sesuatu jawatankuasa yang ditubuhkan di bawah subseksyen (1) hendaklah menepati apa-apa arahan atau petunjuk yang diberikan kepadanya dari semasa ke semasa oleh Lembaga dan Lembaga boleh, pada bila-bila masa, memberhentikan, atau mengubah keanggotaan, jawatankuasa yang dilantik sedemikian.

(7) Peruntukan Jadual Kedua, kecuali perenggan 7, hendaklah terpakai bagi sesuatu jawatankuasa yang ditubuhkan di bawah subseksyen (1) sebagaimana ia terpakai bagi Lembaga.

(8) Dalam pemakaian peruntukan Jadual Kedua bagi sesuatu jawatankuasa—

- (a) sebutan tentang “Lembaga” hendaklah ditafsirkan sebagai sebutan tentang “jawatankuasa”;
- (b) sebutan tentang “Pengerusi” hendaklah ditafsirkan sebagai sebutan tentang “pengerusi”; dan
- (c) sebutan tentang “Menteri” hendaklah ditafsirkan sebagai sebutan tentang “Lembaga”.

## Senat

**16A.** (1) Maka hendaklah ditubuhkan Senat Universiti untuk menasihati Lembaga tentang segala perkara akademik Universiti.

(2) Senat hendaklah terdiri daripada—

- (a) Naib Canselor sebagai Pengerusi;
- (b) semua Timbalan Naib Canselor;
- (c) semua Dekan dan Ketua Sekolah dan Pusat;
- (d) tiga wakil daripada Provos yang dilantik oleh Naib Canselor; dan
- (e) tiga anggota kanan kakitangan akademik Universiti.

(3) Pendaftar hendaklah menjadi Setiausaha Senat.

(4) Pelantikan di bawah perenggan (2)(e) hendaklah dibuat oleh Lembaga bagi tempoh dua tahun.

(5) Naib Canselor boleh mengko-opt mana-mana orang lain untuk menjadi anggota Senat atau untuk menghadiri mesyuarat Senat, tetapi seseorang yang diko-opt tidak mempunyai hak untuk mengundi.

(5A) Dalam masa ketiadaan Naib Canselor, seorang Timbalan Naib Canselor hendaklah mempengerusikan apa-apa mesyuarat Senat.

(6) Senat hendaklah membuat syor kepada Lembaga tentang segala perkara yang berhubungan dengan —

- (a) kandungan dan penyusunan kursus pengajian yang diadakan di Universiti;
- (b) kaedah pendidikan, pengajaran dan latihan yang dijalankan di Universiti;
- (c) standard pendidikan dalam kursus pengajian yang diadakan di Universiti;
- (d) kurikulum dan kursus pengajian yang dijalankan di Universiti;
- (e) kebolehlaksanaan atau selainnya apa-apa cadangan berkenaan dengan mana-mana kurikulum atau kursus pengajian yang dijalankan atau yang akan dijalankan di Universiti;
- (f) penetapan kelayakan yang dikehendaki bagi penerimaan masuk ke mana-mana kursus pengajian yang diadakan di Universiti;
- (g) cadangan bagi penubuhan apa-apa kursus pengajian baru yang hendak dijalankan, atau pemberhentian mana-mana kursus pengajian yang sedia ada yang dijalankan, di Universiti; dan
- (h) pengurniaan penghormatan akademik, *fellowship*, ijazah, diploma, sijil, hadiah, biasiswa dan kepujian akademik yang lain.

(7) Tiada ketetapan boleh diluluskan oleh Lembaga yang berhubungan dengan mana-mana perkara yang disebut dalam

subseksyen (6) melainkan jika Senat terlebih dahulu diberi peluang mencatatkan dan menghantar pendapatnya kepada Lembaga tentang perkara itu.

(8) Bagi maksud membolehkannya melaksanakan fungsinya dan menunaikan kewajipannya, Senat boleh melantik apa-apa jawatankuasa atau jawatankuasa kecil yang terdiri daripada anggotanya dan juga mana-mana orang yang diko-opt sebagai anggota di bawah subseksyen (5), dengan syarat bahawa mana-mana orang yang diko-opt tidak mempunyai hak untuk mengundi.

(9) Senat boleh mewakilkan mana-mana kewajipan, fungsi atau tanggungjawabnya kepada jawatankuasa atau jawatankuasa kecilnya.

(10) Tertakluk kepada Akta ini, Senat boleh menentukan tataranya sendiri.

(11) Peruntukan Jadual Kedua, kecuali perenggan 7, hendaklah terpakai bagi Senat yang ditubuhkan di bawah seksyen ini sebagaimana ia terpakai bagi Lembaga.

(12) Dalam pemakaian peruntukan Jadual Kedua bagi Senat—

- (a) sebutan tentang “Lembaga” hendaklah ditafsirkan sebagai sebutan tentang “Senat”; dan
- (b) sebutan tentang “Menteri” hendaklah ditafsirkan sebagai sebutan tentang “Lembaga”.

### **Persatuan Alumni**

**16B.** (1) Tertakluk kepada kelulusan Lembaga, maka adalah sah bagi tidak kurang daripada tiga puluh orang siswazah Institut Teknologi MARA dan siswazah Universiti untuk membentuk dan menubuhkan persatuan alumni masing-masing.

(2) Setiap persatuan alumni hendaklah dikelolakan dan ditadbirkan mengikut perlembagaannya, dan perlembagaan yang dibuat sedemikian atau apa-apa pindaan kepada perlembagaan itu tidak boleh berkuat kuasa melainkan jika kelulusan bertulis Lembaga diperoleh terlebih dahulu.



(3) Sebutan dalam subseksyen (1) tentang “Institut Teknologi MARA” ialah sebutan tentang Institut Teknologi MARA yang wujud sebaik sebelum tarikh mula berkuat kuasanya seksyen ini.

17. *(Dipotong oleh Akta A964).*

18. *(Dipotong oleh Akta A964).*

19. *(Dipotong oleh Akta A964).*

#### BAHAGIAN IV

#### PEGAWAI DAN KAKITANGAN LAIN UNIVERSITI

##### **Canselor**

**19A.** (1) Maka hendaklah ada seorang Canselor yang hendaklah menjadi Ketua Universiti dan hendaklah, apabila hadir, mempengerusikan mana-mana Konvokesyen dan hendaklah mempunyai apa-apa kuasa lain dan melaksanakan apa-apa kewajipan lain sebagaimana yang diberikan atau dikenakan ke atasnya oleh atau di bawah Akta ini.

(2) Canselor ialah Yang di-Pertuan Agong.

##### **Pelantikan Pro-Canselor**

**19B.** (1) Canselor boleh melantik, atas nasihat Menteri, mana-mana orang menjadi Pro-Canselor sebagaimana yang difikirkannya sesuai.

(2) Jika kerana apa-apa sebab Canselor tidak dapat menjalankan mana-mana fungsinya di bawah Akta ini, dia boleh memberi kuasa mana-mana Pro-Canselor untuk menjalankan fungsi itu bagi pihaknya.

(3) Setiap Pro-Canselor hendaklah memegang jawatan selama tempoh yang diperkenankan oleh Canselor.

**Pelantikan, kuasa dan kewajipan Naib Canselor dan Timbalan Naib Canselor**

20. (1) Maka hendaklah ada seorang Naib Canselor Universiti yang hendaklah dilantik oleh Menteri.

(2) Naib Canselor hendaklah berkhidmat dalam jawatannya mengikut kehendak Menteri dan Menteri boleh pada bila-bila masa membatalkan pelantikan itu tanpa memberikan apa-apa sebab.

(3) Tertakluk kepada peruntukan subseksyen (2), tempoh jawatan dan syarat perkhidmatan lain Naib Canselor hendaklah ditentukan oleh Menteri dan Universiti adalah terikat dengannya.

(4) Naib Canselor hendaklah menjadi ketua pegawai eksekutif, pentadbiran dan akademik Universiti.

(5) Maka hendaklah menjadi kewajipan Naib Canselor untuk memastikan bahawa peruntukan Akta ini dan peruntukan kaedah-kaedah dan perundangan subsidiari lain yang dibuat di bawahnya dipatuhi, dan dia hendaklah mempunyai semua kuasa yang perlu bagi maksud ini.

(6) Tertakluk kepada peruntukan Akta ini dan peruntukan kaedah-kaedah dan perundangan subsidiari lain yang dibuat di bawahnya, Naib Canselor hendaklah menjalankan pengawasan am ke atas persediaan bagi pendidikan, pengajaran, latihan, kewangan, pentadbiran, kebajikan dan tatatertib dalam Universiti, dan boleh menjalankan semua kuasa lain yang diberikan kepadanya oleh Akta ini dan mana-mana kaedah dan perundangan subsidiari lain yang dibuat di bawahnya.

(7) Maka hendaklah ada seorang Timbalan Naib Canselor Universiti atau lebih yang hendaklah dilantik oleh Menteri, selepas berunding dengan Naib Canselor.

(7A) Mana-mana orang yang layak dan sesuai sama ada dari dalam atau luar Universiti boleh dilantik sebagai Timbalan Naib Canselor, dan tempoh jawatan dan syarat perkhidmatan lain bagi seorang Timbalan Naib Canselor hendaklah ditentukan oleh Menteri selepas berunding dengan Naib Canselor.

(8) Jika bagi apa-apa tempoh yang lama Naib Canselor tidak dapat oleh sebab sakit, bercuti atau apa-apa sebab lain menjalankan

mana-mana fungsi jawatannya, Timbalan Naib Canselor atau, jika ada lebih daripada seorang Timbalan Naib Canselor, mana-mana seorang daripada mereka yang dinamakan oleh Menteri hendaklah menjalankan fungsi itu, dan sekiranya Timbalan Naib Canselor atau semua Timbalan Naib Canselor (jika ada lebih daripada seorang) tidak ada atau hilang upaya, Menteri hendaklah membuat apa-apa perkiraan sementara sebagaimana yang difikirkannya patut bagi penjalanan fungsi itu.

(9) Timbalan Naib Canselor yang dinamakan di bawah subseksyen (8) hendaklah memangku jawatan Naib Canselor dalam masa mana-mana tempoh yang jawatan Naib Canselor itu kosong.

### **Pendaftar**

**21.** (1) Universiti hendaklah mempunyai seorang Pendaftar yang hendaklah dilantik oleh Lembaga dengan terma dan syarat perkhidmatan yang diluluskan oleh Lembaga.

(2) Pendaftar hendaklah menjadi pegawai utama Pejabat Pendaftaran Universiti dengan apa-apa fungsi dan kewajipan sebagaimana yang ditetapkan oleh Lembaga.

(3) Pendaftar hendaklah melaksanakan fungsinya dan menunaikan kewajipannya di bawah arahan dan kawalan Naib Canselor.

### **Bendahari**

**22.** (1) Universiti hendaklah mempunyai seorang Bendahari yang hendaklah dilantik oleh Lembaga dengan terma dan syarat perkhidmatan yang diluluskan oleh Lembaga.

(2) Bendahari hendaklah menjadi pegawai utama kewangan Universiti dengan apa-apa fungsi dan kewajipan sebagaimana yang diberikan kepadanya oleh Lembaga; dia hendaklah melaksanakan fungsinya dan menunaikan kewajipannya di bawah arahan dan kawalan Naib Canselor.

### **Pelantikan pegawai utama lain**

**22A.** (1) Universiti hendaklah mempunyai mana-mana pegawai utama lain yang hendaklah dilantik oleh Lembaga dengan terma dan syarat perkhidmatan yang diluluskan oleh Lembaga.

(2) Pegawai utama itu hendaklah melaksanakan apa-apa fungsi dan menunaikan apa-apa kewajipan sebagaimana yang ditentukan oleh Lembaga dan hendaklah melaksanakan fungsi dan menunaikan kewajipan itu di bawah arahan dan kawalan Naib Canselor.

### **Pelantikan kakitangan lain**

**23.** (1) Lembaga boleh melantik, dengan terma dan syarat perkhidmatan yang diluluskan oleh Lembaga, kakitangan lain yang perlu bagi menjalankan maksud Universiti.

(2) Seseorang anggota kakitangan yang dilantik di bawah subseksyen (1) hendaklah di bawah arahan dan kawalan am Naib Canselor.

### **Tatatertib kakitangan Universiti**

**\*23A.** (1) Lembaga hendaklah mempunyai kuasa tatatertib ke atas semua kakitangannya dan hendaklah menjalankan kawalan tatatertib berkenaan dengan kesemua orang itu mengikut Akta ini dan mana-mana kaedah yang dibuat di bawah seksyen 35.

(2) Lembaga boleh, melalui pemberitahuan dalam *Warta*, menubuhkan jawatankuasa tatatertib yang berlainan bagi kategori kakitangan yang berlainan.

(3) Jawatankuasa tatatertib hendaklah menjalankan kuasanya dalam segala perkara berhubungan dengan tatatertib tiap-tiap kakitangan yang diletakkan di bawah bidang kuasanya.

(4) Tiada kakitangan boleh menjadi anggota mana-mana jawatankuasa tatatertib yang mempunyai kuasa tatatertib ke atas mana-mana kakitangan yang berpangkat lebih tinggi daripadanya.

(5) Dalam apa-apa hal jika seseorang anggota jawatankuasa tatatertib itu sendiri merupakan pengadu dalam apa-apa prosiding tatatertib di hadapan jawatankuasa tatatertib itu, maka dia tidak boleh hadir dalam prosiding itu dan lembaga hendaklah melantik mana-mana orang lain untuk mengambil bahagian dalam prosiding itu.

(6) Pada menjalankan tugas dan kuasa tatatertibnya, jawatankuasa tatatertib hendaklah mempunyai kuasa untuk mengambil tindakan tatatertib dan mengenakan mana-mana hukuman tatatertib atau apa-apa gabungan dua atau lebih hukuman tatatertib yang diperuntukkan di bawah kaedah-kaedah yang dibuat di bawah seksyen 35.

(7) Jawatankuasa tatatertib tidak mempunyai bidang kuasa berkenaan dengan Naib Canselor.

(8) Mana-mana kakitangan yang tidak berpuas hati dengan keputusan jawatankuasa tatatertib boleh, dalam masa tiga puluh hari dari tarikh penyampaian keputusan itu kepadanya, merayu secara bertulis terhadap keputusan itu kepada Lembaga.

(9) Apabila Lembaga menimbangkan sesuatu rayuan di bawah subseksyen (8), anggota jawatankuasa tatatertib yang terhadapnya keputusan rayuan itu dibuat yang juga anggota Lembaga tidak boleh hadir atau mengambil bahagian dengan apa-apa cara dalam apa-apa prosiding berhubung dengan rayuan itu.

(10) Lembaga hendaklah mempunyai kuasa untuk mengesahkan, mengakaskan atau mengubah keputusan jawatankuasa tatatertib atau memberikan apa-apa arahan tentang rayuan itu sebagaimana yang difikirkannya patut dan wajar.

(11) Keputusan Lembaga atas sesuatu rayuan adalah muktamad.

## BAHAGIAN IVA

### PERUNTUKAN BERHUBUNGAN DENGAN PELAJAR

#### **Tatatertib pelajar Universiti**

**\*23B.** (1) Naib Canselor hendaklah mempunyai kuasa tatatertib ke atas tiap-tiap pelajar.

(2) Naib Canselor hendaklah mempunyai kuasa untuk mengambil tindakan tatatertib dan mengenakan apa-apa hukuman tatatertib yang diperuntukkan di bawah kaedah-kaedah yang dibuat di bawah seksyen 35.

---

\*CATATAN— Seksyen 23B belum berkuat kuasa— lihat P.U. (B) 461/1996.

(3) Naib Canselor boleh mewakili mana-mana kuasa, kewajipan atau fungsi tatatertibnya kepada mana-mana kakitangan, atau kepada mana-mana lembaga kakitangan, berkenaan dengan mana-mana pelajar tertentu, atau mana-mana golongan atau kategori pelajar Universiti:

Dengan syarat bahawa tiada apa-apa perwakilan boleh dibuat di bawah subseksyen ini kepada mana-mana kakitangan sebagaimana yang diarahkan secara bertulis oleh Menteri.

(4) Kakitangan atau lembaga kakitangan yang kepadanya mana-mana kuasa, kewajipan atau tugas di bawah subseksyen (3) telah diwakili hendaklah menjalankan, menunaikan atau melaksanakannya di bawah arahan dan kawalan Naib Canselor yang hendaklah mempunyai kuasa untuk mengkaji semula, membatalkan atau mengubah apa-apa keputusan atau dapatan kakitangan atau lembaga kakitangan itu.

(5) Mana-mana pelajar yang tidak berpuas hati dengan keputusan—

(a) Naib Canselor; atau

(b) mana-mana orang atau lembaga yang diwakili dengan kuasa, kewajipan atau fungsi di bawah subseksyen (3),

boleh merayu terhadap keputusan itu kepada Menteri dan Menteri boleh, jika difikirkannya patut, menolak terus rayuan itu.

(6) Jika Menteri tidak menolak terus rayuan itu di bawah subseksyen (5), dia hendaklah melantik suatu jawatankuasa yang terdiri daripada dua orang atau lebih, dari dalam atau luar Universiti, untuk menimbangkan rayuan itu dan membuat syornya kepada Menteri, dan, apabila syor itu diterima, Menteri bolehlah memberikan apa-apa keputusan mengenai rayuan itu sebagaimana yang difikirkannya patut dan wajar.

### **Jawatankuasa Perwakilan Pelajar**

**\*23c.** (1) Universiti hendaklah mempunyai suatu Jawatankuasa Perwakilan Pelajar (“JPP”).

(2) Peruntukan Jadual Ketiga hendaklah terpakai bagi JPP.

### **Penubuhan badan pelajar lain**

**\*23D.** (1) Walau apa pun seksyen 23c, maka sah bagi tidak kurang daripada sepuluh orang pelajar—

- (a) dengan terlebih dahulu mendapat kelulusan Naib Canselor yang diberikan selepas mendapat persetujuan Menteri; dan
- (b) tertakluk kepada apa-apa had dan syarat yang ditentukan oleh Naib Canselor,

menubuhkan suatu badan pelajar yang terdiri daripada pelajar bagi menganjurkan sesuatu tujuan atau kepentingan tertentu dalam Universiti.

(2) Peruntukan Jadual Ketiga, kecuali perenggan 1 dan 7, hendaklah terpakai dengan apa-apa pengubahsuaian yang perlu bagi sesuatu badan pelajar di bawah seksyen ini sebagaimana ia terpakai bagi JPP.

### **Pembubaran JPP atau badan pelajar lain**

**\*23E.** (1) Menteri atau Naib Canselor boleh, menurut budi bicara mutlakunya, tanpa memberikan apa-apa sebab baginya—

- (a) menggantung atau membubarkan JPP atau mana-mana badan pelajar yang ditubuhkan di bawah seksyen 23D; dan
- (b) memberikan apa-apa arahan atau petunjuk yang berbangkit atau mengambil apa-apa langkah berbangkit yang perlu atau suai manfaat untuk menguatkuasakan penggantungan atau pembubaran itu.

(2) Penggantungan atau pembubaran JPP atau sesuatu badan pelajar yang ditubuhkan di bawah seksyen 23D—

- (a) hendaklah berkuat kuasa dengan serta-merta apabila dibuat keputusan untuk menggantung atau membubarkan JPP atau badan pelajar itu; dan
- (b) adalah muktamad.

**Pelajar atau pertubuhan, badan atau kumpulan pelajar dilarang bersekutu dengan persatuan, dsb., kecuali jika diluluskan oleh Menteri**

**\*23F.** (1) Tiada seorang pun, semasa dia menjadi seorang pelajar, boleh menjadi anggota, atau boleh dengan apa-apa cara bersekutu dengan, mana-mana persatuan, parti politik, kesatuan sekerja atau mana-mana pertubuhan, badan atau kumpulan orang yang lain—

- (a) sama ada atau tidak ia ditubuhkan di bawah mana-mana undang-undang;
- (b) sama ada ia di dalam atau di luar Universiti; dan
- (c) sama ada ia di dalam atau di luar Malaysia,

kecuali sebagaimana yang diperuntukkan oleh atau di bawah Akta ini, atau kecuali sebagaimana yang diluluskan terlebih dahulu secara bertulis oleh Menteri.

(2) Tiada pertubuhan, badan atau kumpulan pelajar sama ada ditubuhkan oleh, di bawah atau mengikut Akta ini, boleh bergabung, bersekutu atau mempunyai apa-apa urusan lain dengan, mana-mana persatuan, parti politik, kesatuan sekerja atau mana-mana pertubuhan, badan atau kumpulan orang yang lain—

- (a) sama ada atau tidak ia ditubuhkan di bawah mana-mana undang-undang;
- (b) sama ada ia di dalam atau di luar Universiti; dan
- (c) sama ada di dalam atau di luar Malaysia,

kecuali sebagaimana yang diperuntukkan oleh atau di bawah Akta ini, atau kecuali sebagaimana yang diluluskan terlebih dahulu secara bertulis oleh Menteri.

(3) Tiada seorang pun, semasa dia menjadi seorang pelajar, boleh menyatakan atau berbuat apa-apa jua yang boleh ditafsirkan sebagai menyatakan—

- (a) sokongan, simpati atau bangkangan kepada mana-mana parti politik atau kesatuan sekerja; atau
- (b) sokongan atau simpati dengan mana-mana pertubuhan, badan atau kumpulan orang yang menyalahi undang-undang.



(4) Tiada pertubuhan, badan atau kumpulan pelajar yang ditubuhkan oleh, di bawah atau mengikut Akta ini, atau mana-mana pertubuhan, badan atau kumpulan pelajar yang lain, boleh menyatakan atau berbuat apa-apa jua yang boleh ditafsirkan sebagai menyatakan—

- (a) sokongan, simpati atau bantahan kepada mana-mana parti politik atau kesatuan sekerja; atau
- (b) sokongan atau simpati dengan mana-mana pertubuhan, badan atau kumpulan orang yang menyalahi undang-undang.

(5) Mana-mana orang yang melanggar subseksyen (1), (2), (3) atau (4) melakukan suatu kesalahan dan apabila disabitkan boleh didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya.

### **Pelajar atau pertubuhan, badan atau kumpulan pelajar dilarang memungut wang**

**\*23G.** (1) Tiada pelajar, atau pertubuhan, badan atau kumpulan pelajar, boleh, di dalam atau di luar kampus, atau di dalam atau di luar Malaysia—

- (a) memungut atau cuba memungut;
- (b) menganjurkan atau cuba menganjurkan apa-apa pemungutan;
- (c) membuat atau cuba membuat apa-apa rayuan secara lisan atau bertulis atau selainnya untuk mendapatkan,

apa-apa wang atau harta lain daripada mana-mana orang, yang bukan wang atau harta yang genap atau hampir genap masanya untuk dipungut di bawah atau menurut kuasa mana-mana undang-undang bertulis, kontrak atau obligasi lain di sisi undang-undang.

(2) Mana-mana orang yang melanggar subseksyen (1) melakukan suatu kesalahan dan apabila disabitkan boleh didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya.

(3) Menteri boleh, dalam apa-apa hal tertentu, menurut budi bicara mutlaknyanya, memberi mana-mana orang pengecualian daripada pemakaian subseksyen (1), tertakluk kepada apa-apa had dan syarat dan bagi apa-apa tempoh yang difikirkannya patut menurut budi bicara mutlaknyanya.

(4) Tanpa menjejaskan peruntukan Akta ini atau mana-mana undang-undang bertulis lain yang berhubungan dengan perwakilan kuasa, Menteri boleh, melalui pemberitahuan dalam *Warta*, mewakili penjalanan kuasanya di bawah subseksyen (3) kepada Naib Canselor berkenaan dengan pemungutan wang di dalam kampus daripada orang di dalam kampus, tertakluk kepada apa-apa syarat dan sekatan yang ditetapkan dalam pemberitahuan itu.

(5) Peruntukan seksyen ini adalah tambahan kepada dan tidak mengurangkan kuasa peruntukan mana-mana undang-undang bertulis yang berhubungan dengan pemungutan rumah ke rumah dan di jalan, pemungutan awam, atau pemungutan wang atau penjualan lencana.

### **Liabiliti jenayah pemegang jawatan, dsb., pertubuhan, badan atau kumpulan pelajar**

**\*23H.** (1) Jika apa-apa kesalahan dilakukan di bawah mana-mana undang-undang bertulis—

- (a) sama ada atau tidak mana-mana orang telah disabitkan atasnya; dan
- (b) kesalahan itu telah dilakukan atau berupa sebagai telah dilakukan atas nama atau bagi pihak—
  - (i) mana-mana pertubuhan, badan atau kumpulan pelajar yang ditubuhkan oleh, di bawah atau mengikut Akta ini; atau
  - (ii) mana-mana pertubuhan, badan atau kumpulan pelajar yang lain,

tiap-tiap pemegang jawatan pertubuhan, badan atau kumpulan pelajar itu dan tiap-tiap orang yang menguruskan atau membantu dalam pengurusan pertubuhan, badan atau kumpulan pelajar itu pada masa kesalahan itu dilakukan hendaklah disifatkan melakukan kesalahan itu dan boleh dikenakan hukuman yang ditetapkan oleh undang-undang bagi kesalahan itu, melainkan jika dia membuktikan sehingga mahkamah berpuas hati bahawa kesalahan itu dilakukan tanpa pengetahuannya dan bahawa dia telah menjalankan segala usaha yang wajar untuk mencegah pelakuan kesalahan itu.

(2) Mana-mana pemegang jawatan, atau mana-mana orang yang menguruskan atau membantu dalam pengurusan, mana-mana

---

\*CATATAN— Seksyen 23H belum berkuat kuasa— lihat P.U. (B) 461/1996.

pertubuhan, badan atau kumpulan yang disebut dalam subseksyen (1) boleh didakwa di bawah seksyen ini, walaupun dia mungkin tidak mengambil bahagian dalam melakukan kesalahan itu.

(3) Dalam mana-mana pendakwaan di bawah seksyen ini terhadap seseorang pemegang jawatan, atau mana-mana orang yang menguruskan atau membantu dalam pengurusan, mana-mana pertubuhan, badan atau kumpulan yang disebut dalam subseksyen (1), apa-apa dokumen yang dijumpai dalam milikan mana-mana pemegang jawatan, atau orang yang menguruskan atau membantu dalam pengurusan, pertubuhan, badan atau kumpulan itu, atau dalam milikan seseorang anggota pertubuhan, badan atau kumpulan itu adalah menjadi keterangan *prima facie* tentang kandungannya bagi maksud membuktikan bahawa apa-apa jua telah dilakukan atau berupa sebagai telah dilakukan oleh atau bagi pihak pertubuhan, badan atau kumpulan itu.

## Anggapan

**\*23i.** Dalam mana-mana pendakwaan di bawah Akta ini—

- (a) tidaklah perlu bagi pihak pendakwa membuktikan bahawa sesuatu pertubuhan, badan atau kumpulan orang mempunyai sesuatu nama atau bahawa ia telah ditubuhkan atau biasanya dikenali dengan sesuatu nama tertentu;
- (b) jika apa-apa buku, akaun, tulisan, senarai anggota, meterai, panji-panji atau lambang kebesaran bagi, atau yang berhubungan dengan, atau berupa sebagai berhubungan dengan, mana-mana pertubuhan, badan atau kumpulan orang dijumpai dalam milikan, jagaan atau di bawah kawalan mana-mana orang, maka hendaklah dianggap, sehingga dibuktikan sebaliknya, bahawa orang itu ialah anggota pertubuhan, badan atau kumpulan itu, dan pertubuhan, badan atau kumpulan itu hendaklah dianggap, sehingga dibuktikan sebaliknya, wujud pada masa buku, akaun, tulisan, senarai anggota, meterai, panji-panji atau lambang kebesaran itu dijumpai sedemikian; dan
- (c) jika apa-apa buku, akaun, tulisan, senarai anggota, meterai, panji-panji atau lambang kebesaran bagi, atau yang berhubungan dengan, mana-mana pertubuhan, badan atau kumpulan orang dijumpai dalam milikan, jagaan atau di bawah kawalan mana-mana orang, maka hendaklah

dianggap, sehingga dibuktikan sebaliknya, bahawa orang itu membantu dalam pengurusan pertubuhan, badan atau kumpulan itu.

**Penggantungan dan pembuangan pelajar yang dipertuduh atas kesalahan jenayah atau yang terhadapnya kesalahan jenayah dibuktikan**

**\*23j.** (1) Jika seseorang pelajar dipertuduh dengan suatu kesalahan jenayah—

- (a) dia boleh, selepas sahaja daripada itu, digantung daripada menjadi seorang pelajar; dan
- (b) dia tidak boleh, jika digantung sedemikian di bawah perenggan (a), semasa menanti keputusan prosiding jenayah itu, berada di dalam atau memasuki kampus Universiti.

(2) Jika mahkamah mendapati bahawa pertuduhan atas suatu kesalahan jenayah dibuktikan terhadap seseorang pelajar—

- (a) pelajar itu hendaklah, selepas sahaja daripada itu, terhenti menjadi seorang pelajar; dan
- (b) pelajar itu tidak boleh, selepas sahaja daripada itu, berada di dalam atau memasuki kampus Universiti.

(3) Seseorang pelajar yang ditahan atau yang tertakluk kepada apa-apa perintah yang mengenakan sekatan ke atasnya di bawah mana-mana undang-undang bertulis yang berhubungan dengan tahanan pencegahan atau keselamatan dalam negeri—

- (a) hendaklah, selepas sahaja daripada itu, terhenti menjadi pelajar; dan
- (b) tidak boleh, selepas sahaja daripada itu, berada di dalam atau memasuki kampus Universiti.

(4) Seseorang pelajar yang terhenti menjadi pelajar di bawah subseksyen (2) atau (3) tidak boleh, selepas pembuangan itu, diterima masuk menjadi pelajar Universiti tanpa terlebih dahulu mendapat kelulusan bertulis Menteri, dan jika Menteri memberikan kelulusan itu, Menteri boleh mengenakan apa-apa had dan syarat yang difikirkannya patut dikenakan menurut budi bicara mutlaknyanya.

(5) Mana-mana orang—

- (a) yang berada di dalam atau memasuki kampus Universiti berlawanan dengan subseksyen (1), (2) atau (3); atau
- (b) yang dapat masuk menjadi pelajar Universiti berlawanan dengan subseksyen (4),

melakukan suatu kesalahan dan apabila disabitkan boleh didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-duanya.

(6) Subseksyen (1), (2), (3), (4) dan (5) hendaklah terpakai bagi seseorang walaupun mungkin terdapat apa-apa permohonan, petisyen, rayuan, atau prosiding lain yang dibuat olehnya atau oleh mana-mana orang lain yang belum diputuskan di dalam mana-mana mahkamah atau di hadapan mana-mana pihak berkuasa lain berkenaan dengan prosiding jenayah, tahanan, atau perintah yang mengenakan sekatan itu, mengikut mana-mana yang berkenaan:

Dengan syarat bahawa apabila diputuskan permohonan, petisyen, rayuan atau prosiding lain itu Menteri boleh, menurut budi bicara mutlaknyanya, memberikan perhatian kepada keputusan itu dan memberikan pengecualian kepada pelajar itu daripada pemakaian subseksyen (1), (2), (3), (4) atau (5), mengikut mana-mana yang berkenaan, atas apa-apa had dan syarat yang difikirkannya patut dikenakan mengikut budi bicara mutlaknyanya.

(7) Menteri boleh, pada bila-bila masa, dalam apa-apa hal tertentu, menurut budi bicara mutlaknyanya, memberikan pengecualian kepada mana-mana orang daripada pemakaian subseksyen (1), (2), (3), (4) atau (5), mengikut mana-mana yang berkenaan, sama ada—

- (a) tanpa syarat;
- (b) atas apa-apa had dan syarat; atau
- (c) bagi apa-apa tempoh,

yang difikirkannya patut menurut budi bicara mutlaknyanya.

(8) Tanpa menjejaskan peruntukan mana-mana undang-undang bertulis lain berhubungan dengan perwakilan kuasa, Menteri boleh, melalui pemberitahuan dalam *Warta*, mewakilkan penjalanan mana-mana kuasanya di bawah seksyen ini kepada Naib Canselor, tertakluk kepada apa-apa syarat dan sekatan yang ditetapkan dalam pemberitahuan itu.

**Kuasa Menteri untuk menggantung atau membuang pelajar daripada Universiti**

**\*23k.** (1) Menteri boleh—

- (a) apabila dibuat representasi oleh Universiti; dan
- (b) jika dia berpuas hati bahawa adalah wajar berbuat sedemikian demi kepentingan Universiti;

memerintahkan secara bertulis supaya mana-mana pelajar—

- (aa) digantung daripada menjadi pelajar bagi apa-apa tempoh yang dinyatakan oleh Menteri dalam perintah itu; atau
- (bb) dibuang daripada Universiti,

dan pelajar itu hendaklah, selepas sahaja daripada itu, digantung atau dibuang sedemikian, mengikut mana-mana yang berkenaan.

(2) Seseorang pelajar yang berkenaan dengannya Menteri telah memberikan perintah secara bertulis di bawah subseksyen (1) boleh, dalam masa satu bulan dari tarikh perintah itu, membuat representasi kepada Menteri supaya perintah itu dibatalkan atau diubah.

(3) Menteri boleh memberikan apa-apa keputusan yang difikirkannya sesuai dan patut berkenaan dengan mana-mana representasi yang dibuat di bawah subseksyen (2), dan keputusan itu adalah muktamad.

(4) Sesuatu perintah untuk menggantung seseorang pelajar di bawah subseksyen (1) boleh, dari semasa ke semasa, dilanjutkan selama apa-apa tempoh yang dinyatakan oleh Menteri berkenaan dengan setiap pelanjutan.

(5) Seseorang pelajar—

- (a) yang digantung daripada menjadi pelajar; atau
- (b) yang dibuang daripada Universiti,

di bawah subseksyen (1), tidak boleh, dalam masa penggantungan itu, atau selepas pembuangan itu, mengikut mana-mana yang berkenaan, berada di dalam atau memasuki kampus Universiti kecuali dengan terlebih dahulu mendapat kelulusan bertulis Menteri, dan jika Menteri memberikan kelulusan itu, Menteri boleh mengenakan apa-apa syarat yang difikirkannya patut dikenakan menurut budi bicara mutlakunya.

---

\*CATATAN— Seksyen 23k belum berkuat kuasa— lihat P.U. (B) 461/1996.

(6) Seseorang pelajar yang dibuang daripada Universiti di bawah subseksyen (1) tidak boleh, selepas pembuangan itu, diterima masuk menjadi pelajar Universiti tanpa terlebih dahulu mendapat kelulusan bertulis Menteri, dan jika Menteri memberikan kelulusan itu, Menteri boleh mengenakan apa-apa syarat yang difikirkannya patut dikenakan menurut budi bicara mutlakunya.

(7) Seseorang pelajar—

- (a) yang berada di dalam atau memasuki kampus Universiti berlawanan dengan subseksyen (5); atau
- (b) yang dapat masuk menjadi pelajar Universiti berlawanan dengan subseksyen (6),

melakukan suatu kesalahan dan apabila disabitkan boleh didenda tidak melebihi satu ribu ringgit atau dipenjarakan selama tempoh tidak melebihi enam bulan atau kedua-keduanya.

(8) Suatu perintah untuk menggantung atau membuang seseorang pelajar daripada Universiti di bawah seksyen ini boleh, pada bila-bila masa, dibatalkan oleh Menteri dan Menteri boleh, menurut budi bicara mutlakunya, mengenakan apa-apa syarat yang difikirkannya patut dikenakan ke atas pembatalan itu.

### **Dikeluarkan daripada atau ditahan daripada masuk ke dalam Universiti akan pelajar yang digantung atau dibuang**

**\*23L.** Jika seseorang pelajar digantung atau dibuang daripada Universiti di bawah Akta ini, Naib Canselor—

- (a) hendaklah mengambil atau menyebabkan diambil segala langkah yang perlu untuk memastikan atau mendapatkan supaya pelajar itu dikeluarkan daripada atau ditahan daripada masuk ke dalam Universiti dengan bantuan mana-mana kakitangan Universiti; dan
- (b) boleh meminta mana-mana pegawai polis membantu dalam memastikan atau mendapatkan supaya pelajar itu dikeluarkan daripada atau ditahan daripada masuk ke dalam Universiti dan pegawai polis itu boleh, atas permintaan itu, bagi maksud itu, menggunakan apa-apa kekerasan yang munasabah atau selainnya sebagaimana yang perlu ke atas pelajar itu atau mana-mana orang lain.

## BAHAGIAN V

## KEWANGAN

**Penubuhan Kumpulan Wang**

**24.** (1) Bagi maksud Akta ini maka dengan ini ditubuhkan suatu Kumpulan Wang yang dinamakan Kumpulan Wang Universiti Teknologi MARA dan yang hendaklah ditadbirkan dan dikawal oleh Lembaga.

(2) Kumpulan Wang hendaklah terdiri daripada—

- (a) wang yang diperuntukkan dari semasa ke semasa oleh Parlimen;
- (b) wang yang dari semasa ke semasa dipinjamkan kepada Universiti oleh Kerajaan;
- (c) apa-apa pemberian sukarela kepada Universiti;
- (d) wang yang didapati daripada pengendalian sesuatu projek, skim atau perusahaan yang dibiayai daripada Kumpulan Wang;
- (e) apa-apa harta, pelaburan, subsidi, pajakan, gadai janji, gadaian atau debentur yang diperoleh oleh atau diletakhakkan pada Universiti;
- (f) wang yang didapati atau timbul daripada apa-apa harta, pelaburan, subsidi, pajakan, gadai janji, gadaian atau debentur yang diperoleh oleh atau diletakhakkan kepada Universiti; dan
- (g) semua wang atau harta lain yang dengan apapun caranya menjadi kena dibayar kepada atau diletakhakkan pada Universiti berkenaan dengan apa-apa perkara yang bersampingan dengan kuasa, fungsi dan kewajipannya.

(3) Semua wang yang dibayar kepada Universiti hendaklah digunakan atau dibelanjakan oleh Universiti bagi semua atau mana-mana maksud Universiti mengikut anggaran yang diluluskan oleh Menteri.

(4) Maka menjadi kewajipan Lembaga dan Naib Canselor untuk memelihara Kumpulan Wang dengan menjalankan, melaksanakan dan menunaikan kuasa, fungsi dan kewajipannya di bawah Akta



ini supaya jumlah hasil Universiti, tertakluk kepada apa-apa arahan yang diberikan oleh Menteri di bawah seksyen 29, cukup untuk membayar semua wang yang boleh dipertanggungjawabkan dengan sewajarnya kepada akaun hasilnya, dari setahun ke setahun.

(5) Universiti boleh melaburkan dalam sekuriti Kerajaan atau sekuriti lain yang diluluskan terlebih dahulu secara bertulis oleh Menteri Kewangan, wang Kumpulan Wang yang tidak dikehendaki secara segera bagi perbelanjaan semasa, dengan kuasa dari semasa ke semasa untuk mengubah mana-mana pelaburan itu tertakluk kepada kelulusan secara bertulis oleh Menteri Kewangan didapati berkenaan dengan mana-mana perubahan yang mengakibatkan sesuatu pelaburan dalam sekuriti selain sekuriti Kerajaan.

(6) Universiti boleh menyimpan, sama ada dalam simpanan tetap atau dalam akaun semasa, mana-mana wang yang pada masa itu tidak dilaburkan dalam mana-mana bank di Malaysia yang memegang suatu lesen yang sah di bawah peruntukan Akta Bank dan Institusi-Institusi Kewangan 1989 [Akta 372] dan diluluskan terlebih dahulu secara bertulis bagi maksud itu oleh Menteri.

### **Kumpulan wang rizab**

**25.** (1) Universiti hendaklah menubuhkan dan menguruskan suatu kumpulan wang rizab.

(2) Pembayaran masuk ke dalam dan keluar daripada kumpulan wang rizab hendaklah ditentukan oleh Lembaga:

Dengan syarat bahawa tiada sesuatu bahagian daripada Kumpulan Wang rizab itu boleh digunakan selain bagi maksud Universiti.

### **Anggaran tahunan**

**26.** (1) Naib Canselor hendaklah, tidak lewat daripada bulan April dalam tiap-tiap satu tahun, membentangkan di hadapan Lembaga anggaran lengkap hasil dan perbelanjaan Universiti, termasuk perbelanjaan modal, bagi tahun kewangan yang berikutnya; anggaran itu hendaklah mengandungi semua butir yang dikehendaki oleh Lembaga dan hendaklah dalam bentuk yang ditentukan oleh Lembaga atau yang ditetapkan.

(2) Suatu salinan anggaran itu hendaklah dihantar kepada tiap-tiap seorang anggota Lembaga tidak kurang daripada empat belas hari sebelum mesyuarat yang dalamnya anggaran itu akan dibentangkan.

(3) Lembaga hendaklah menimbangkan anggaran yang dihantar sedemikian dan hendaklah meluluskannya sama ada dengan tidak diubah atau tertakluk kepada perubahan yang difikirkannya patut, dan perubahan itu boleh termasuk penambahan, pengubahsuaian atau penolakan sesuatu butiran yang terdapat dalam anggaran itu.

(4) Lembaga boleh sebelum membenarkan anggaran di bawah subseksyen (3) merujukkan balik mana-mana butiran kepada Naib Canselor bagi ditimbangkannya semula.

(5) Anggaran yang dibenarkan oleh Lembaga hendaklah dikemukakan kepada Menteri, dan Menteri boleh menolak atau mengubah anggaran itu, atau sesuatu bahagiannya, atau mengubahsuaikan sesuatu butiran dalamnya, atau menambahkan sesuatu butiran kepadanya.

(6) Jika peruntukan kewangan tambahan dikehendaki dalam sesuatu tahun Lembaga boleh, dari semasa ke semasa, dalam tahun itu menyebabkan suatu anggaran tambahan disediakan oleh Naib Canselor dan diserahkan kepada Lembaga.

(7) Tiap-tiap anggaran tambahan itu hendaklah ditimbangkan dan dibenarkan oleh Lembaga, dan dikemukakan kepada Menteri, dan Menteri hendaklah menguruskannya seolah-olah anggaran itu ialah anggaran tahunan asal.

(8) Sesuatu anggaran tambahan yang disediakan di bawah seksyen ini hendaklah menunjukkan sumber yang daripadanya akan dibayar perbelanjaan tambahan yang ditunjukkan dalam anggaran tambahan itu.

(9) Universiti tidak boleh melakukan perbelanjaan melainkan dengan mengikut anggaran atau anggaran tambahan yang diluluskan oleh Menteri:

Dengan syarat bahawa Lembaga boleh memindahkan semua atau sesuatu bahagian daripada wang yang diperuntukkan—

- (a) kepada satu butiran perbelanjaan tahunan berulang kepada suatu butiran perbelanjaan tahunan berulang yang lain; atau

(b) kepada satu butiran perbelanjaan modal kepada suatu butiran perbelanjaan modal yang lain.

(10) Anggaran tahunan dan anggaran tambahan hendaklah menunjukkan dalam bahagian yang berasingan, perbelanjaan tahunan berulang dan perbelanjaan modal Universiti.

### **Akaun dan audit**

**27.** (1) Universiti hendaklah menyimpan akaun dan rekod lain yang sewajarnya berkenaan dengan perjalanannya dan hendaklah menyediakan penyata akaun bagi tiap-tiap satu tahun kewangan.

(2) Akaun Universiti hendaklah diaudit tiap-tiap tahun oleh Ketua Audit Negara.

(3) Selepas akhir tiap-tiap satu tahun kewangan, dan selepas sahaja akaun Universiti diaudit, tetapi, walau bagaimanapun sebelum pengemukaan anggaran tahunan bagi tahun kewangan yang berikutnya kepada Menteri di bawah subseksyen 26(5) Lembaga hendaklah menyebabkan suatu salinan penyata akaun itu dihantar kepada Menteri, bersama dengan suatu salinan apa-apa pandangan yang dibuat oleh Ketua Audit Negara mengenai mana-mana penyata atau mengenai akaun Universiti.

(4) Menteri hendaklah menyebabkan suatu salinan tiap-tiap penyata akaun dan pandangan itu dibentangkan di hadapan tiap-tiap satu Majlis Parlimen dalam mesyuaratnya yang berikut selepas dia menerima salinan itu.

### **Hadiah**

**28.** (1) Lembaga boleh bagi pihak Universiti menerima sebagai pemberian, hadiah, pemberian berwasiat, subsidi, legasi atau selainnya, harta dan wang sebagai bantuan kepada kewangan Universiti dengan syarat yang ditetapkannya.

(2) Mana-mana harta atau wang yang diterima oleh Universiti di bawah subseksyen (1) hendaklah diuruskan mengikut peruntukan Akta ini dan hendaklah, tertakluk kepada terma dan syarat yang

dengannya harta atau wang itu diberikan dan diterima, digunakan olehnya bagi segala atau mana-mana daripada maksud Universiti mengikut peruntukan Akta ini.

(3) Suatu daftar hendaklah disimpan bagi semua harta dan wang yang diterima oleh Lembaga di bawah subseksyen (1) termasuk nama pemberi dan apa-apa syarat khas yang dengannya harta atau wang itu telah diberikan.

(4) Semua harta dan wang yang diberikan dan diterima bagi sesuatu maksud tertentu hendaklah digunakan dan ditadbirkan mengikut maksud yang baginya harta atau wang itu telah diberikan dan diterima dan hendaklah diperakaunkan secara berasingan.

### **Pengenaan surcaj**

**28A.** (1) Seseorang yang merupakan atau pernah menjadi kakitangan Universiti boleh disurcaj jika didapati oleh Lembaga bahawa orang itu—

- (a) telah tidak memungut wang yang terhutang kepada Universiti yang pemungutannya adalah atau pernah menjadi tanggungjawabnya;
- (b) adalah atau pernah bertanggungjawab bagi apa-apa pembayaran wang tidak sepatutnya daripada Kumpulan Wang atau bagi apa-apa pembayaran wang yang tidak diluluskan dengan sewajarnya;
- (c) adalah atau pernah bertanggungjawab, secara langsung atau secara tidak langsung, atas apa-apa kekurangan pada, atau atas pemusnahan, apa-apa wang, setem, sekuriti, barang simpanan atau harta lain Universiti;
- (d) sebagai atau semasa menjadi pegawai perakaunan, tidak menyimpan akaun atau rekod yang sepatutnya; dan
- (e) tidak membuat apa-apa pembayaran, atau adalah atau pernah bertanggungjawab atas apa-apa kelewatan membuat pembayaran daripada Universiti, wang kepada mana-mana orang yang kepadanya pembayaran itu kena dibuat di bawah mana-mana undang-undang, kontrak, perjanjian atau perkiraan yang dibuat antara orang itu dengan Universiti.

(2) Lembaga hendaklah, sebelum seseorang disurcaj di bawah subseksyen (1), menyampaikan suatu notis bertulis kepadanya yang memintanya menunjukkan sebab mengapa dia tidak sepatutnya disurcaj.

(3) Jika penjelasan yang memuaskan hati tidak diterima dalam tempoh tiga puluh hari dari tarikh penyampaian notis di bawah subseksyen (2), Lembaga boleh—

(a) dalam hal perenggan (1)(a), (b) dan (c), mensurcaj terhadap orang itu sejumlah wang yang tidak melebihi amaun yang tidak dipungut, atau pembayaran tidak sepatutnya yang dibuat, atau kekurangan nilai, atau kerugian yang disebabkan, pada wang, setem, sekuriti, barang simpanan atau harta lain Universiti; dan

(b) dalam hal perenggan (1)(d) dan (e), mensurcaj terhadap orang itu sejumlah wang yang difikirkan patut oleh Lembaga.

(4) Lembaga hendaklah memberitahu orang yang disurcaj itu berkenaan dengan apa-apa surcaj yang dibuat di bawah subseksyen (3).

(5) Walau apa pun subseksyen (3) dan (4), Lembaga boleh pada bila-bila masa menarik balik mana-mana surcaj yang berkenaan dengannya suatu penjelasan yang memuaskan hati telah diterima atau jika selainnya ternyata bahawa tiada surcaj patut dibuat, dan Lembaga hendaklah dengan serta-merta memberitahu orang yang disurcaj itu tentang penarikan balik itu.

(6) Amaun mana-mana surcaj yang dibuat di bawah subseksyen (3) dan tidak ditarik balik di bawah subseksyen (5) hendaklah menjadi hutang yang kena dibayar kepada Universiti daripada orang yang disurcaj itu dan boleh dituntut dan didapatkan dalam mana-mana mahkamah atas guaman Universiti dan boleh juga jika diarahkan sedemikian oleh Lembaga didapatkan melalui potongan—

(a) gaji orang yang disurcaj; atau

(b) pencen orang yang disurcaj,

melalui ansuran bulanan yang sama banyak yang tidak melebihi satu perempat daripada jumlah gaji atau pencen bulanan, mengikut mana-mana yang berkenaan, orang itu.

(7) Dalam apa-apa tindakan surcaj terhadap Naib Canselor, keanggotaan Lembaga bagi maksud subseksyen (1) hingga (6) tidak termasuk Naib Canselor.

(8) Bagi maksud perenggan (1)(d), “pegawai perakaunan” termasuklah tiap-tiap kaki tangan Universiti yang dipertanggungjawabkan dengan kewajipan memungut, menerima, atau mengakaunkan, atau yang sebenarnya memungut, menerima atau mengakaunkan, apa-apa wang Universiti, atau yang dipertanggungjawabkan dengan kewajipan membayar, atau yang sebenarnya membayar, apa-apa wang itu, dan tiap-tiap kakitangan yang dipertanggungjawabkan untuk menerima, menjaga atau melupuskan, atau mengakaunkan, apa-apa wang, setem, sekuriti, barang simpanan atau harta Universiti atau yang sebenarnya menerima, memegang atau melupuskan wang, setem, sekuriti, barang simpanan atau harta itu.

## BAHAGIAN VI

### AM

#### **Kuasa Menteri untuk memberikan arahan**

**29.** (1) Lembaga dan Naib Canselor hendaklah bertanggungjawab kepada Menteri, dan Menteri boleh, dari semasa ke semasa, memberikan segala arahan, sama ada bersifat am atau khusus, yang difikirkannya perlu atau suai manfaat, iaitu arahan yang tidak berlawanan dengan peruntukan Akta ini dan yang hendaklah mengikut dasar, strategi dan garis panduan kebangsaan mengenai pendidikan tinggi yang dibentuk dan ditentukan oleh Majlis Pendidikan Tinggi Negara yang ditubuhkan di bawah seksyen 3 Akta Majlis Pendidikan Tinggi Negara 1996 [*Akta 546*], dan menjadi kewajipan Lembaga atau Naib Canselor, mengikut mana-mana yang berkenaan, dengan seberapa segera yang boleh, untuk menguatkuasakan dan menjalankan semua arahan itu.

(2) Tanpa menyentuh keluasan peruntukan subseksyen (1), kuasa Menteri untuk memberi arahan di bawah subseksyen (1) hendaklah termasuk kepada memberi arahan—

(a) mengenai pelupusan aset modal; dan

(b) mengenai penggunaan pendapatan daripada pelupusan itu.

### **Kuasa Menteri untuk mewakilkan**

**29A.** (1) Menteri boleh, tertakluk kepada apa-apa syarat, batasan atau sekatan sebagaimana yang dinyatakan, mewakilkan kepada Lembaga penjalanan, penunaian dan pelaksanaan mana-mana kuasa, kewajipan atau fungsinya di bawah Akta ini.

(2) Perwakilan di bawah seksyen ini—

(a) boleh dibatalkan pada bila-bila masa oleh Menteri; dan

(b) tidak menghalang Menteri daripada menjalankan, menunaikan, atau melaksanakan kuasa, kewajipan atau fungsi yang diwakilkan itu sendiri dalam apa-apa hal jika didapatinya suai manfaat untuk berbuat demikian.

### **Konvokesyen**

**29B.** (1) Konvokesyen bagi penganugerahan ijazah, diploma, sijil dan kepujian akademik yang lain hendaklah diadakan pada setiap tahun, atau seberapa kerap mengikut sebagaimana yang diarahkan oleh Canselor, pada tarikh yang diluluskan oleh Canselor.

(2) Jika Canselor tidak hadir atau jika Pro-Canselor yang diberi kuasa bagi maksud ini oleh Canselor tidak hadir, maka Naib Canselor hendaklah mempengerusikan sesuatu Konvokesyen.

### **Penyata, laporan, akaun dan maklumat**

**30.** (1) Universiti hendaklah memberi Menteri semua penyata, laporan, akaun dan maklumat berkenaan dengan harta dan aktiviti yang dikehendaki oleh Menteri dari semasa ke semasa.

(2) Tanpa menyentuh keluasan peruntukan subseksyen (1), Lembaga hendaklah, tidak lewat daripada tiga puluh hari bulan April dalam tiap-tiap tahun, menyebabkan dibuat dan dihantar kepada Menteri suatu laporan mengenai aktiviti Universiti dalam tahun kewangan yang lalu dan dalam apa-apa bentuk dan mengandungi apa-apa maklumat yang berhubungan dengan perjalanan dan dasar Universiti sebagaimana yang diarahkan oleh Menteri dari semasa ke semasa.

(3) Menteri hendaklah menyebabkan suatu salinan tiap-tiap satu laporan mengenai Universiti dibentangkan di hadapan tiap-tiap

satu Majlis Parlimen dalam mesyuaratnya yang berikut selepas laporan itu diterima oleh Menteri.

### **Perlindungan Pihak Berkuasa Awam**

**31.** Akta Perlindungan Pihak Berkuasa Awam 1948 [*Akta 198*] terpakai bagi apa-apa tindakan, guaman, pendakwaan atau prosiding terhadap Universiti atau terhadap Lembaga atau mana-mana anggota Lembaga, atau terhadap Naib Canselor, atau terhadap mana-mana anggota kakitangan atau ejen Universiti berkenaan dengan apa-apa perbuatan, kecuaiian atau kemungkiran yang dilakukan olehnya, mengikut mana-mana yang berkenaan, atas sifatnya itu.

### **Pekhidmat awam**

**32.** Semua anggota Lembaga, Naib Canselor, mana-mana anggota kakitangan atau ejen Universiti, dalam masa menunaikan kewajipan mereka atau menjalankan fungsi atau kuasa mereka hendaklah disifatkan sebagai pekhidmat awam dalam pengertian Kanun Keseksaan [*Akta 574*].

### **Obligasi merahsiakan**

**33.** (1) Kecuali bagi maksud Akta ini atau bagi maksud sesuatu prosiding jenayah di bawah Akta ini, seseorang anggota Lembaga, atau Naib Canselor, atau seseorang anggota kakitangan atau ejen Universiti tidak boleh menzahirkan apa-apa maklumat berkenaan dengan Universiti dan yang tidak disiarkan menurut Akta ini.

(2) Seseorang yang melanggar peruntukan subseksyen (1) melakukan suatu kesalahan dan boleh, apabila disabitkan, dipenjarakan selama tempoh tidak melebihi enam bulan atau didenda tidak melebihi satu ribu ringgit, atau kedua-duanya.

### **Prosiding sivil**

**34.** Walau apa pun peruntukan mana-mana undang-undang bertulis yang berlawanan, dalam prosiding sivil oleh atau terhadap Universiti—

- (a) mana-mana orang yang memegang jawatan Peguam Persekutuan dan yang diberi kuasa oleh Peguam Negara bagi maksud itu; atau



- (b) mana-mana pegawai Universiti yang diberi kuasa bagi maksud itu mengikut arahan khas atau am Naib Canselor,

boleh, bagi pihak Universiti, memulakan, membawa, menghadiri dan menjalankan pembicaraan itu dan boleh membuat dan melakukan semua kehadiran, perbuatan dan permohonan berkenaan dengan prosiding itu.

### **Perbuatan atau peninggalan yang dilakukan dengan suci hati**

**34A.** Tiada tindakan atau guaman boleh dimulakan atau dikekalkan dalam mana-mana mahkamah terhadap—

- (a) Lembaga;
- (b) anggota Lembaga;
- (c) Naib Canselor;
- (d) Timbalan Naib Canselor;
- (e) Senat;
- (f) anggota Senat;
- (g) kakitangan Universiti; dan
- (h) seseorang yang diberi kuasa untuk bertindak bagi atau bagi pihak mana-mana badan atau orang di bawah perenggan (a) hingga (g),

bagi apa-apa perbuatan atau peninggalan yang dilakukan dengan suci hati dalam menjalankan atau menunaikan kuasa atau kewajibannya di bawah Akta ini dengan kepercayaan munasabah bahawa tindakan itu adalah perlu bagi maksud yang diniatkan untuk dicapai melaluinya.

### **Penyampaian**

**34B.** (1) Penyampaian apa-apa notis di bawah Akta ini atau mana-mana kaedah yang dibuat di bawahnya hendaklah dilaksanakan melalui pos berdaftar kepada orang yang tersentuh olehnya dan hendaklah disifatkan telah disampaikan pada hari yang mengikuti hari notis itu sepatutnya dihantar dalam perjalanan biasa pos.

(2) Jika orang yang kepadanya dialamatkan suatu surat berdaftar yang mengandungi apa-apa notis yang boleh diberikan di bawah Akta ini atau mana-mana kaedah yang dibuat di bawahnya diberitahu tentang hakikat bahawa ada surat berdaftar yang menantinya di pejabat pos, dan orang itu enggan, abai atau tidak mengambil surat berdaftar itu, notis itu hendaklah disifatkan telah disampaikan kepadanya pada tarikh dia diberitahu sedemikian.

### **Kuasa Lembaga untuk membuat kaedah-kaedah**

**35.** (1) Lembaga boleh membuat kaedah-kaedah yang perlu bagi maksud menguatkuasakan peruntukan Akta ini.

(2) Khususnya, dan tanpa menyentuh keluasan peruntukan subseksyen (1), kaedah-kaedah itu boleh mengadakan peruntukan bagi semua atau mana-mana perkara yang berikut, iaitu—

- (a) penyediaan, audit, dan pengemukaan kepada Menteri anggaran, belanjawan, pernyataan dan penyata;
- (b) fungsi, kewajipan \*dan tata tertib kakitangan;
- (c) (*Dipotong oleh Akta A964*);
- (d) penetapan prinsip yang berkenaan dengan pemberian ijazah, diploma, sijil dan kepujian akademik yang lain yang hendak dianugerahkan oleh Universiti;
- (e) syarat penerimaan masuk, kebajikan \*dan tata tertib pelajar;
- (ea) apa-apa perkara yang berhubungan dengan JPP dan badan pelajar lain;
- (f) pengurusan perpustakaan, makmal, bengkel dan kemudahan lain yang disediakan oleh Universiti;
- (g) penubuhan dan pengaturan skim pencen, persaraan dan kumpulan wang simpanan bagi kakitangan atau sesuatu golongan daripada mereka;
- (h) apa-apa perkara dalam kuasa Universiti di bawah seksyen 4 atau di bawah mana-mana peruntukan lain Akta ini.

---

\*CATATAN— Perkataan “dan tata tertib” dalam perenggan 35(2)(b) dan (e) belum berkuat kuasa— lihat P.U. (B) 461/1996.

BAHAGIAN VII

PERALIHAN

**Tafsiran bagi Bahagian ini**

**36.** Dalam Bahagian ini, melainkan jika kandungan ayatnya menghendaki makna yang lain—

“ITM” ertinya Universiti Teknologi MARA yang ditubuhkan oleh MARA dan yang sedia ada sebaik sebelum tarikh yang ditetapkan;

“MARA” ertinya Majlis Amanah Rakyat yang ditubuhkan oleh Akta Majlis Amanah Rakyat 1966 [*Akta 489*].

**Pemindahan kuasa, hak, kewajipan, dll.**

**37.** Tertakluk kepada peruntukan Akta ini, semua kuasa, hak, keistimewaan, kewajipan, tanggungan atau obligasi yang sebaik sebelum tarikh yang ditetapkan adalah bagi MARA berkenaan dengan ITM, atau adalah bagi ITM, hendaklah, mulai dari tarikh itu, diturunkan kepada Universiti yang ditubuhkan oleh Akta ini.

**Pindah hak milik harta**

**38.** (1) Tertakluk kepada peruntukan Akta ini, semua tanah yang sebaik sebelum tarikh yang ditetapkan terletak hak pada MARA berkenaan dengan ITM, atau terletak hak pada ITM, atau terletak hak pada mana-mana orang bagi pihak ITM, hendaklah, pada tarikh itu, terletak hak pada Universiti yang ditubuhkan di bawah Akta ini.

(2) Tertakluk kepada peruntukan Akta ini, semua tanah yang sebaik sebelum tarikh yang ditetapkan dirizabkan di bawah peruntukan mana-mana undang-undang bertulis yang berhubungan dengan tanah bagi maksud MARA berkenaan dengan ITM, atau bagi maksud ITM, hendaklah, pada tarikh itu, disifatkan sebagai dirizabkan bagi maksud Universiti yang ditubuhkan di bawah Akta ini.

(3) Tertakluk kepada peruntukan Akta ini, dan apa-apa arahan Menteri, semua harta dan aset selain tanah yang sebaik sebelum tarikh yang ditetapkan terletak hak pada—

- (a) MARA berkenaan dengan ITM; atau
- (b) mana-mana orang bagi pihak MARA berkenaan dengan ITM; atau
- (c) ITM; atau
- (d) mana-mana orang bagi pihak ITM,

hendaklah, pada tarikh itu, terletak hak pada Universiti yang ditubuhkan oleh Akta ini.

(4) Maka dengan ini diisytiharkan bahawa mana-mana harta, sama ada harta alih atau harta tak alih, yang, sebaik sebelum tarikh yang ditetapkan, telah digunakan bagi maksud yang selepas tarikh itu menjadi maksud Universiti yang ditubuhkan oleh Akta ini hendaklah, pada tarikh itu, terletak hak pada Universiti tersebut.

(5) Tertakluk kepada peruntukan Akta ini, jika sebelum sahaja tarikh yang ditetapkan apa-apa prosiding telah diambil di bawah mana-mana undang-undang bertulis yang berhubungan dengan pengambilan tanah secara paksa bagi maksud MARA berkenaan dengan ITM, atau bagi maksud ITM, prosiding itu hendaklah mulai tarikh itu, disifatkan telah diambil berkenaan dengan pengambilan tanah bagi maksud Universiti yang ditubuhkan oleh Akta ini.

### **Kontrak yang sedia ada**

**39.** Tertakluk kepada peruntukan Akta ini, dan apa-apa arahan Menteri, semua surat ikatan, bon, perjanjian, surat cara dan perkiraan kerja yang berkuat kuasa sebaik sebelum tarikh yang ditetapkan dan yang menyentuh mana-mana daripada harta yang dipindahkan hak milik di bawah seksyen 38 hendaklah terus berkuat kuasa dan berkesan dengan sepenuhnya terhadap atau bagi faedah Universiti yang ditubuhkan di bawah Akta ini dan boleh dikuatkuasakan secara sepenuhnya dan berkesan seolah-olah Universiti yang ditubuhkan oleh Akta ini telah dinamakan dalamnya atau telah menjadi satu pihak kepadanya sebagai menggantikan—

- (a) MARA berkenaan dengan ITM; atau
- (b) mana-mana orang bagi pihak MARA berkenaan dengan ITM; atau

- (c) ITM; atau
- (d) mana-mana orang bagi pihak ITM.

### **Penerusan prosiding jenayah dan sivil**

**40.** (1) Tertakluk kepada peruntukan Akta ini, mana-mana prosiding, sama ada sivil atau jenayah, atau apa-apa alasan tindakan yang belum selesai atau yang sedia ada sebaik sebelum tarikh yang ditetapkan dan yang diambil oleh atau terhadap—

- (a) MARA berkenaan dengan ITM; atau
- (b) mana-mana orang yang bertindak bagi pihak MARA berkenaan dengan ITM; atau
- (c) ITM; atau
- (d) mana-mana orang yang bertindak bagi pihak ITM,

boleh diteruskan atau dibawa oleh atau terhadap Universiti yang ditubuhkan oleh Akta ini sebagaimana ia mungkin diambil oleh atau terhadap masing-masing yang disebut di atas seolah-olah Akta ini tidak diluluskan.

(2) Apa-apa rayuan yang dibuat atau mana-mana kebenaran untuk merayu yang dipohonkan pada atau selepas tarikh yang ditetapkan terhadap sesuatu keputusan yang diberikan dalam sesuatu prosiding di sisi undang-undang sebelum tarikh itu boleh dibuat oleh atau terhadap Universiti yang ditubuhkan oleh Akta ini.

### **Pindah hak milik wang**

**41.** (1) Semua wang yang berada dalam, atau yang kena dibayar kepada, Kumpulan Wang MARA yang ditubuhkan di bawah seksyen 13 Akta Majlis Amanah Rakyat 1966, berkenaan dengan ITM, hendaklah pada tarikh yang ditetapkan terletak hak kepada Universiti yang ditubuhkan oleh Akta ini dan dipindahkan hak milik kepada Kumpulan Wang.

(2) Semua wang kepunyaan atau yang kena dibayar kepada ITM sebaik sebelum tarikh yang ditetapkan, hendaklah, pada tarikh itu, terletak hak pada Universiti yang ditubuhkan oleh Akta ini dan dipindahkan hakmilik kepada Kumpulan Wang.

### **Penerusan pegawai dan pekhidmat**

**42.** (1) Tiap-tiap orang yang sebaik sebelum tarikh yang ditetapkan telah diguna khidmat sebagai seorang pegawai atau penjawat MARA yang berkhidmat dengan ITM hendaklah, pada tarikh itu, disifatkan telah diguna khidmat oleh Universiti yang ditubuhkan oleh Akta ini seolah-olah Universiti tersebut telah wujud terdahulu dari tarikh itu sepanjang perkhidmatan pegawai atau penjawat itu dengan ITM.

(2) Tiap-tiap orang yang sebaik sebelum tarikh yang ditetapkan telah diguna khidmat sebagai seorang pegawai atau penjawat MARA yang berkhidmat dengan ITM hendaklah pada tarikh itu diguna khidmat sebagai seorang pegawai atau penjawat, mengikut mana-mana yang berkenaan, bagi Universiti yang ditubuhkan oleh Akta ini dengan terma dan syarat perkhidmatan yang tidak kurang baiknya daripada yang didapati sebaik sebelum tarikh yang ditetapkan.

(3) Seksyen ini dijadikan undang-undang bagi maksud negara.

### **Pelajar**

**43.** Semua orang yang sebaik sebelum tarikh yang ditetapkan ialah pelajar ITM hendaklah, pada tarikh itu, disifatkan sebagai pelajar Universiti yang ditubuhkan oleh Akta ini.

### **Prosiding tatatertib yang belum selesai**

**44.** Semua prosiding tatatertib yang, sebaik sebelum tarikh yang ditetapkan, adalah belum selesai terhadap mana-mana kakitangan atau mana-mana pelajar ITM boleh, pada atau selepas tarikh itu, diteruskan terhadap kakitangan atau pelajar oleh pihak berkuasa yang berkenaan bagi Universiti yang ditubuhkan oleh Akta ini.

### **Cawangan**

**45.** Semua cawangan ITM yang wujud sebaik sebelum tarikh yang ditetapkan hendaklah mulai daripada tarikh itu disifatkan sebagai Cawangan Universiti yang ditubuhkan oleh Akta ini.

### **Pembubaran badan pengeloaan**

**46.** Mana-mana badan pengeloaan ITM yang wujud sebaik sebelum tarikh yang ditetapkan hendaklah, pada tarikh itu, terbubar.

### **Kuasa Menteri untuk meminda Bahagian ini**

**47.** (1) Menteri boleh melalui perintah yang disiarkan dalam *Warta*, membuat ubah suaian, perubahan, tambahan, atau apa-apa jua pindaan lain kepada peruntukan Bahagian ini yang difikirkannya perlu atau suai manfaat untuk mengelak, menghapuskan, menyelesaikan, atau mengatasi apa-apa kesulitan atau anomali, atau untuk menampung sesuatu peninggalan, atau selainnya bagi maksud menguatkuasakan peruntukan Akta ini.

(2) Sesuatu perintah yang dibuat di bawah seksyen ini hendaklah dibentangkan di hadapan kedua-dua Majlis Parlimen dalam mesyuaratnya yang berikut selepas perintah itu disiarkan dalam *Warta*.

---

#### JADUAL PERTAMA

[Perenggan 4A(1)(c)]

### **Kuasa Universiti untuk membuat kaedah-kaedah berkenaan dengan perbadanan**

**1.** Universiti hendaklah, pada atau sebelum tarikh mana-mana perbadanan ditubuhkan di bawah perenggan 4A(1)(c), menetapkan melalui kaedah-kaedah—

- (a) maksud dan tujuan yang baginya perbadanan itu ditubuhkan;
- (b) hak, kuasa, kewajipan dan fungsi perbadanan itu;
- (c) sistem pengurusan perbadanan itu; dan

- (d) hubungan antara perbadanan itu dengan Universiti dan hak kawalan oleh Universiti ke atas perbadanan itu.

#### **Kuat kuasa kaedah-kaedah**

2. Mana-mana kaedah yang dibuat di bawah perenggan 1 hendaklah mengikat perbadanan yang berkenaan dengannya kaedah-kaedah itu dibuat dan hendaklah mempunyai kuat kuasa bagi segala maksud seolah-olah kaedah-kaedah itu dibuat di bawah Akta ini.

#### **Kuasa untuk meminda, dsb., kaedah-kaedah**

3. Universiti boleh pada bila-bila masa meminda, membatalkan, atau menambah kepada, apa-apa kaedah yang dibuat berkenaan dengan mana-mana perbadanan di bawah perenggan 1.

#### **Penggulungan**

4. (1) Universiti boleh, dengan kelulusan Menteri, selepas berunding dengan Menteri Kewangan, mengarahkan supaya mana-mana perbadanan yang ditubuhkan olehnya digulung dan dibubarkan.

(2) Apabila mana-mana perbadanan dibubarkan di bawah subperenggan (1), aset perbadanan itu hendaklah berpindah hak milik kepada dan terletak hak pada Universiti selepas ditunaikan segala tanggungannya.

(3) Penggulungan sesuatu perbadanan di bawah subperenggan (1) hendaklah dijalankan mengikut apa-apa cara yang ditetapkan oleh Universiti.

#### **Perbadanan hendaklah menjadi pertubuhan perbadanan**

5. Tiap-tiap perbadanan yang ditubuhkan di bawah perenggan 4A(1)(c)—
- (a) hendaklah menjadi suatu pertubuhan perbadanan dengan apa-apa nama yang diberikan oleh Universiti kepadanya;
  - (b) hendaklah kekal turun-temurun;
  - (c) hendaklah mempunyai meterai perbadanan;
  - (d) boleh membawa guaman dan dibawa guaman atas nama perbadanannya;
  - (e) boleh membuat kontrak;
  - (f) boleh memegang, dan membuat apa-apa urusan mengenai atau dengan, apa-apa harta alih atau tak alih; dan
  - (g) boleh membuat segala perkara dan benda lain yang bersampingan atau berkaitan dengan sesuatu pertubuhan perbadanan yang selaras dengan Akta ini,



tertakluk kepada apa-apa sekatan atau batasan sebagaimana yang dinyatakan oleh Universiti dalam setiap hal.

### **Meterai perbadanan bagi perbadanan**

6. (1) Tiap-tiap perbadanan hendaklah mempunyai suatu meterai perbadanan yang mengandungi apa-apa tanda sebagaimana yang ditentukan oleh perbadanan dengan kelulusan Universiti.

(2) Meterai perbadanan itu boleh dari semasa ke semasa dipecahkan, ditukar, diubah atau dibuat baharu sebagaimana yang difikirkan patut oleh perbadanan dengan kelulusan Universiti.

(3) Sehingga suatu meterai diadakan oleh perbadanan, suatu cap yang mengandungi nama perbadanan melingkungi huruf "UNIVERSITI TEKNOLOGI MARA" boleh digunakan dan hendaklah disifatkan sebagai meterai perbadanan bagi perbadanan itu.

(4) Meterai perbadanan, atau cap yang disebut dalam subperenggan (3), hendaklah disimpan dalam jagaan mana-mana orang yang diberi kuasa oleh perbadanan, dan hendaklah disahkan oleh orang itu.

(5) Segala surat ikatan, dokumen dan surat cara lain yang berupa sebagai dimeteraikan dengan meterai itu, yang disahkan sebagaimana yang disebut terdahulu, hendaklah disifatkan telah disempurnakan dengan sah sehingga dibuktikan sebaliknya.

(6) Apa-apa dokumen atau surat cara yang jika disempurnakan oleh seseorang yang bukan merupakan suatu pertubuhan perbadanan tidak akan dikehendaki dimeteraikan, boleh disempurnakan oleh perbadanan dengan cara yang serupa; dan mana-mana dokumen atau surat cara itu boleh disempurnakan bagi pihak perbadanan oleh seseorang pegawai atau pekhidmat perbadanan yang diberi kuasa secara am atau khas oleh perbadanan bagi maksud itu.

(7) Meterai perbadanan tiap-tiap perbadanan hendaklah diberi pengiktirafan rasmi dan kehakiman.

---

### JADUAL KEDUA

[Seksyen 13]

### **Hilang kelayakan**

1. Orang yang berikut hilang kelayakan untuk dilantik sebagai atau untuk menjadi anggota Lembaga:

(a) jika telah dibuktikan terhadapnya, atau dia telah disabitkan atas, suatu pertuduhan berkenaan dengan—

(i) kesalahan yang melibatkan fraud, kecurangan atau keburukan akhlak;

- (ii) kesalahan di bawah undang-undang yang berhubungan dengan rasuah;
  - (iii) kesalahan di bawah Akta ini; atau
  - (iv) apa-apa kesalahan lain yang boleh dihukum dengan pemenjaraan selama tempoh yang melebihi dua tahun;
- (b) jika dia menjadi bankrap;
- (c) jika dia didapati atau diisytiharkan tidak sempurna akal atau selainnya tidak berupaya untuk menguruskan hal ehwalnya.

### **Terhenti menjadi anggota**

2. Seseorang anggota Lembaga hendaklah terhenti menjadi anggota—
- (a) jika dia tidak menghadiri mesyuarat Lembaga tiga kali berturut-turut tanpa kebenaran Pengerusi; atau
  - (b) jika pelantikannya dibatalkan.

### **Peletakan jawatan**

3. Seseorang anggota Lembaga boleh meletakkan jawatan pada bila-bila masa dengan memberikan notis satu bulan secara bertulis kepada Pengerusi.

### **Pengisian kekosongan**

4. Jika mana-mana orang terhenti menjadi anggota Lembaga oleh sebab peruntukan Akta ini, seorang lain boleh dilantik oleh Menteri untuk mengisi kekosongan itu bagi baki tempoh yang baginya anggota itu dilantik.

### **Elaun**

5. Anggota Lembaga hendaklah dibayar apa-apa elaun sebagaimana yang ditentukan oleh Menteri.

### **Mesyuarat**

6. (1) Pengerusi hendaklah mempengerusikan mesyuarat Lembaga dan semasa ketiadaannya anggota-anggota Lembaga hendaklah melantik salah seorang daripada mereka untuk mempengerusikan mesyuarat itu.

(2) Pengerusi dan tiap-tiap anggota Lembaga hendaklah mempunyai dan boleh menggunakan satu undi setiap orang, tetapi dalam keadaan bilangan undi sama banyak, Pengerusi atau anggota yang mempengerusikan mesyuarat hendaklah mempunyai dan boleh menggunakan undi pemutus sebagai tambahan kepada undi asalnya.

**Lembaga boleh mengundang orang lain untuk menghadiri mesyuarat**

7. (1) Lembaga boleh mengundang mana-mana orang untuk menghadiri mesyuarat atau pertimbangtelitian Lembaga bagi maksud menasihatinya tentang apa-apa perkara yang dibincangkan tetapi mana-mana orang yang hadir sedemikian tidak berhak untuk mengundi pada mesyuarat atau pertimbangtelitian tersebut.

(2) Seseorang yang diundang di bawah subperenggan (1) hendaklah dibayar apa-apa elaun sebagaimana yang ditentukan oleh Lembaga.

**Minit**

8. Apa-apa minit yang dibuat mengenai mesyuarat Lembaga hendaklah, jika ditandatangani dengan sewajarnya, diterima sebagai keterangan dalam segala prosiding undang-undang tanpa bukti selanjutnya dan tiap-tiap mesyuarat Lembaga yang berkenaan dengannya minit telah dibuat sedemikian hendaklah disifatkan telah dipanggil dan diadakan dengan sewajarnya dan semua anggota pada mesyuarat itu layak dengan sewajarnya untuk bertindak.

**Pendedahan kepentingan**

9. (1) Seseorang anggota Lembaga yang, secara langsung atau secara tidak langsung, mempunyai sendiri atau melalui pekongsinya—

(a) apa-apa kepentingan dalam mana-mana syarikat atau perusahaan yang dengannya Lembaga bercadang untuk hendak membuat sesuatu kontrak; atau

(b) apa-apa kepentingan dalam mana-mana kontrak itu atau dalam apa-apa perkara yang sedang dibincangkan oleh Lembaga,

hendaklah mendedahkan hakikat dan jenis kepentingannya itu kepada Lembaga.

(2) Sesuatu pendedahan di bawah subperenggan (1) hendaklah direkodkan dalam minit Lembaga dan, melainkan jika dibenarkan secara khusus oleh Pengerusi, anggota itu tidak boleh mengambil bahagian dalam apa-apa pertimbangtelitian atau keputusan Lembaga yang berhubungan dengan kontrak atau perkara itu.

**Kesahan perbuatan dan prosiding**

10. Tiada perbuatan yang dilakukan atau prosiding yang diambil di bawah Akta ini boleh dipersoalkan atas alasan bahawa—

(a) ada apa-apa kekosongan dalam keanggotaan, atau ada apa-apa kecacatan dalam penubuhan, Lembaga;

(b) ada pelanggaran peruntukan perenggan 9 oleh seseorang anggota Lembaga; atau

- (c) ada apa-apa peninggalan, kecacatan atau luar aturan yang tidak menyentuh merit kes itu.

---

JADUAL KETIGA

[Seksyen 23C dan 23D]

JAWATANKUASA PERWAKILAN PELAJAR

**Pemilihan JPP**

1. Dalam memilih suatu Jawatankuasa Perwakilan Pelajar, pelajar setiap lapangan tertentu hendaklah memilih, melalui undi rahsia yang dijalankan oleh Naib Canselor, apa-apa bilangan pelajar yang belajar dalam lapangan yang sama banyak sebagaimana yang ditentukan oleh Naib Canselor untuk menjadi wakil dalam JPP; dan pembahagian pendidikan yang dijalankan di Universiti kepada pelbagai lapangan pengajian bagi maksud perenggan ini hendaklah dibuat oleh Naib Canselor.

**Pemegang Jawatan JPP**

2. JPP hendaklah melantik dari kalangan anggotanya—

- (a) seorang Yang Dipertua;
- (b) seorang Naib Yang Dipertua;
- (c) seorang Setiausaha; dan
- (d) seorang Bendahari,

dan pemegang jawatan itu sahajalah pemegang jawatan dalam JPP.

**Tempoh Jawatan JPP dan pemegang jawatannya**

3. Anggota JPP dan pemegang jawatannya hendaklah dipilih bagi tempoh satu tahun.

**Keputusan dengan undi lebih suara**

4. Keputusan JPP hendaklah diambil dengan undi lebih suara tidak kurang daripada dua pertiga daripada anggota yang hadir dan mengundi.

**Jawatankuasa *ad hoc***

5. JPP boleh menubuhkan, dari semasa ke semasa, dengan terlebih dahulu mendapat kelulusan bertulis Naib Canselor jawatankuasa *ad hoc* dari kalangan anggotanya bagi maksud atau tujuan tertentu.

### **Hilang kelayakan berkenaan dengan JPP**

**6. (1)** Tiada pelajar—

(a) yang terhadapnya prosiding tatatertib belum diputuskan; atau

(b) yang telah didapati bersalah atas suatu kesalahan tatatertib,

boleh dipilih atau terus menjadi anggota JPP melainkan jika dibenarkan secara bertulis oleh Naib Canselor.

**(2)** Seseorang pelajar—

(a) yang belum lagi menduduki peperiksaan pertamanya berkenaan dengan kursus pengajiannya; atau

(b) yang telah gagal dalam, atau yang tidak menduduki, peperiksaan yang lalu yang diadakan berkenaan dengan kursus pengajiannya,

sebelum sahaja mana-mana pemilihan yang dicadangkan bagi JPP atau oleh JPP adalah hilang kelayakan untuk dipilih dalam pemilihan atau pemilihan-pemilihan itu.

### **Tujuan dan tugas JPP**

**7.** Tujuan dan fungsi JPP adalah—

(a) untuk membantu dan menggalakan, tertakluk kepada arahan Naib Canselor, kemajuan kemudahan bagi pelajar seperti kemudahan rekreasi dan pembekalan makanan dan minuman;

(b) untuk membuat representasi kepada Naib Canselor tentang perkara yang berhubungan dengan keadaan yang dalamnya pelajar tinggal dan belajar; dan

(c) untuk mengusahakan apa-apa aktiviti lain yang ditentukan oleh Naib Canselor dari semasa ke semasa.

### **Perbelanjaan JPP**

**8. (1)** JPP tidak boleh—

(a) menyenggarakan apa-apa kumpulan wang; atau

(b) membuat apa-apa pemungutan wang atau harta,

daripada apa-apa sumber.

(2) Apa-apa perbelanjaan yang munasabah yang dibenarkan terlebih dahulu secara bertulis oleh Naib Canselor untuk dilakukan oleh JPP boleh dibayar oleh Universiti jika tuntutan bertulis yang munasabah yang disokong dengan resit dan baucer dikemukakan oleh JPP kepada, dan luluskan oleh, Naib Canselor.

**Akaun JPP**

9. (1) Bendahari hendaklah menyimpan akaun JPP yang sewajarnya yang hendaklah diaudit oleh seseorang yang dilantik oleh Naib Canselor.

(2) Sesuatu salinan akaun yang disimpan di bawah subperenggan (1) hendaklah dikemukakan oleh JPP kepada Naib Canselor untuk mendapatkan kelulusan Naib Canselor tidak lewat daripada tiga bulan selepas berakhirnya setiap tahun kewangan, iaitu tahun kewangan sebagaimana yang ditentukan oleh Naib Canselor.

**Mesyuarat JPP**

10. (1) JPP hendaklah mengadakan mesyuarat dari semasa ke semasa sebagaimana yang difikirkannya perlu dan adalah menjadi kewajipan Setiausaha menyimpan minit tiap-tiap mesyuarat JPP dan minit itu hendaklah disahkan pada suatu mesyuarat yang berikutnya.

(2) JPP atau sesuatu jawatankuasa *ad hoc* JPP hendaklah, tidak kurang daripada empat puluh lapan jam sebelum mengadakan apa-apa mesyuarat, memberikan notis tentang tarikh dan masa mesyuarat itu dan agendanya kepada Naib Canselor.

(3) Tiap-tiap mesyuarat JPP atau mesyuarat sesuatu jawatankuasa *ad hoc* JPP hendaklah diadakan hanya di tempat yang disediakan bagi maksud mesyuarat itu oleh Naib Canselor.

(4) Naib Canselor atau wakilnya hendaklah hadir di setiap mesyuarat JPP atau mesyuarat sesuatu jawatankuasa *ad hoc* JPP, melainkan jika Naib Canselor memutuskan selainnya berkenaan dengan mana-mana mesyuarat tertentu.

**Pemeriksaan rekod**

11. Rekod JPP atau rekod sesuatu jawatankuasa *ad hoc* JPP hendaklah sentiasa terbuka untuk diperiksa oleh Naib Canselor atau wakilnya.

**Pertikaian tentang pemilihan**

12. (1) Jika apa-apa pertikaian timbul tentang sama ada mana-mana anggota atau pemegang jawatan JPP atau tentang sesuatu jawatan JPP atau tentang sesuatu jawatankuasa *ad hoc* JPP—

- (a) telah dipilih atau dilantik dengan sewajarnya, mengikut mana-mana yang berkenaan; atau
- (b) berhak menjadi atau masih menjadi anggota atau pemegang jawatannya,

maka pertikaian itu hendaklah diputuskan oleh Naib Canselor atau oleh seseorang yang dilantik olehnya bagi maksud itu.

(2) Keputusan Naib Canselor atau keputusan orang yang dilantik olehnya di bawah subperenggan (1) adalah muktamad.

**Takrif “pelajar” bagi maksud Jadual ini**

**13.** (1) Bagi maksud Jadual ini, “pelajar” tidak termasuk seseorang pegawai awam yang mengikuti kursus pengajian di Universiti.

(2) Seseorang hendaklah terhenti daripada menjadi pelajar mengikut pengertian perenggan ini—

- (a) apabila disiarkan keputusan peperiksaan akhir mana-mana kursus pengajian itu, jika dia lulus peperiksaan itu; atau
  - (b) apabila disiarkan keputusan mana-mana peperiksaan bagi kursus pengajian itu, jika dia gagal dalam peperiksaan itu, sehinggalah dia, sesudah itu, didaftarkan semula bagi kursus pengajian itu atau kursus pengajian lain yang terpakai bagi seseorang pelajar berdaftar di bawah perenggan ini.
-

**UNDANG-UNDANG MALAYSIA****Akta 173****AKTA UNIVERSITI TEKNOLOGI MARA 1976**

## SENARAI PINDAAN

Undang-undang yang meminda	Tajuk ringkas	Berkuat kuasa dari
Akta A652	Akta Institut Teknologi MARA (Pindaan) 1986	01-04-1986
Akta A964	Akta Institut Teknologi MARA (Pindaan) 1996	17-10-1996 (kecuali s. 27 hingga s. 30, subperenggan 37(c)(i), (iv) dan (v) dan Jadual Ketiga hingga s. 38)
Akta A1073	Akta Institut Teknologi MARA (Pindaan) 2000	26-08-1999

---



## UNDANG-UNDANG MALAYSIA

### Akta 173

### AKTA UNIVERSITI TEKNOLOGI MARA 1976

#### SENARAI SEKSYEN YANG DIPINDA

Seksyen	Kuasa meminda	Berkuat kuasa dari
1A	Akta A1073	26-08-1999
2	Akta A964 Akta A1073	17-10-1996 26-08-1999
3	Akta A1073	26-08-1999
3A	Akta A1073	26-08-1999
4	Akta A964 Akta A1073	17-10-1996 26-08-1999
4A	Akta A964	17-10-1996
5	Akta A964	17-10-1996
6	Akta A964	17-10-1996
7	Akta A652 Akta A964 Akta A1073	01-04-1986 17-10-1996 26-08-1999
8	Akta A964	17-10-1996
9	Akta A964	17-10-1996
13	Akta A964 Akta A1073	17-10-1996 26-08-1999
16	Akta A964	17-10-1996
16A	Akta A964 Akta A1073	17-10-1996 26-08-1999
16B	Akta A1073	26-08-1999
17	Akta A964	17-10-1996

Seksyen	Kuasa meminda	Berkuat kuasa dari
18	Akta A964	17-10-1996
19	Akta A964	17-10-1996
19A	Akta A1073	26-08-1999
19B	Akta A1073	26-08-1999
20	Akta A652 Akta A964 Akta A1073	01-04-1986 17-10-1996 26-08-1999
21	Akta A964	17-10-1996
22	Akta A964	17-10-1996
22A	Akta A964	17-10-1996
23	Akta A964	17-10-1996
23A	Akta A964	Belum berkuat kuasa
23B	Akta A964	Belum berkuat kuasa
23c	Akta A964	Belum berkuat kuasa
23D	Akta A964	Belum berkuat kuasa
23E	Akta A964	Belum berkuat kuasa
23F	Akta A964	Belum berkuat kuasa
23G	Akta A964	Belum berkuat kuasa
23H	Akta A964	Belum berkuat kuasa
23I	Akta A964	Belum berkuat kuasa
23J	Akta A964	Belum berkuat kuasa

Seksyen	Kuasa meminda	Berkuat kuasa dari
23K	Akta A964	Belum berkuat kuasa
23L	Akta A964	Belum berkuat kuasa
24	Akta A964	17-10-1996
28	Akta A964	17-10-1996
28A	Akta A964	17-10-1996
29	Akta A964	17-10-1996
29A	Akta A964	17-10-1996
29B	Akta A1073	26-08-1999
34A	Akta A964	17-10-1996
34B	Akta A964	17-10-1996
35	Akta A964	17-10-1996
Jadual Pertama	Akta A964	17-10-1996
Jadual Kedua	Akta A964	17-10-1996
Jadual Ketiga	Akta A964	Belum berkuat kuasa
Keseluruhan Akta	Akta A652 Akta A964 Akta A1073	01-04-1986 17-10-1996 26-08-1999

---